


0 10 20 30 40 50 60 70 80 90 100 110 120 130 140 150

018.852  
7551  
:5



Inches  
1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
8

Centimetres  
1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19

**TIFFEN** Color Control Patches  
© The Tiffen Company 2007

直齋書錄解題卷十五


楚辭類

楚辭十七卷


漢護都水使者光祿大夫劉向集後漢校書郎南郡王逸叔師注知饒州曲阿洪興祖慶善補注逸之注雖未能盡善而自淮南王安以下為訓傳者今不復存其目僅見於隋唐志獨逸注幸而尚傳興祖從而補之於是訓詁名物詳矣

離騷釋文一卷

古本無名氏洪氏得之吳郡林慮德祖其篇次不與今本同今本首騷經次九歌天問九章遠遊卜居漁父九辨招魂大



陳振孫撰



招惜誓招隱七諫哀時命九懷九歎九思釋文亦首騷經次九辨而後九歌天問九章遠遊卜居漁父招隱士招魂九懷七諫九歎哀時命惜誓大招九思洪氏按王逸九章注云皆解於九辨中則釋文篇第蓋舊本也後人始以作者先後次序之耳朱符講按天聖十年陳說之序以爲舊本篇第混并乃考其人之先後重定其篇第然則今本說之所定也余按楚辭劉向所集王逸所注而九歎九思亦列其中蓋後人所益也歟

### 楚辭考異一卷

洪興祖撰興祖少時從柳展如得東坡手校楚辭十卷凡諸本異同皆兩出之後又得洪玉父而下本十四五家參校遂

爲定本始補王逸章句之未備者書成又得姚廷輝本作考

異附古本釋文之後其末又得歐陽永叔孫莘老蘇子容本

於闕子東葉少協校正以補考異之遺洪於是書用力亦以

勤矣秦文獻通考作補注楚辭十七卷考異一卷晁公武曰凡王逸章句有未盡者補之自序云以歐陽永叔晁文

元諸家參考之爲定本又得姚廷輝本作考異此所云亦二書蓋因補注已見前條故不復載然標題終爲脫落也

### 重定楚辭十六卷續楚辭二十卷變離騷二十卷

禮部郎中濟北晁補之無咎撰去九思一篇入續楚辭定著

十六卷篇次亦頗改易又不與陳說之本同續變二篇皆楚

辭流派其曰變者又以其類離騷而少變也新序三篇述其

意甚詳然其去取之際或有不可盡曉者

### 楚辭贅說四卷

右司郎宣城周紫芝少隱撰嘗爲哀湘纍賦以反賈誼揚雄之說又爲此書頗有發明

楚辭集註八卷辨證二卷

侍講建安朱熹元晦撰以王氏洪氏注或迂滯而遠於事情或迫切而著於義理遂別爲之注其訓詁文義之外有當考訂者則見於辨證所以祛前注之蔽陋而明屈子微意於千載之下忠魂義魄頓有生氣其於九歌九章尤爲明白痛快至謂山海經淮南子殆因天問而著書說者反取二書以證天問可謂高世絕識毫髮無遺恨者矣公爲此注在慶元退歸之時序文所謂放臣棄子怨妻去婦蓋有感而託者也其生平於六經皆有訓傳而其殫見洽聞發露不盡者萃見於

此書嗚呼偉矣其篇第視舊本益賈誼二賦而去諫歎懷思屈子所著二十五篇爲離騷而宋玉以下則曰續離騷其言七諫以下辭意平緩意不深切如無所疾痛而強爲呻吟者尤名言也

楚辭後語六卷

朱熹撰凡五十二篇以晁氏續變二書刊定而去取則嚴而有意矣

龍岡楚辭說五卷

永嘉林應辰涓起撰以離騷章分段釋爲二十段九歌九章諸篇亦隨長短分之其推屈子不死於汨羅比諸浮海居夷之意其說甚新而有理以爲離騷一篇辭雖哀痛而意則宏

放與夫直情徑行勇於蹈河者不可同日語且其興寄高遠  
登昆侖歷閩風指西海陟陸皇皆寓言也世儒不以為實顧  
獨信其從彭咸葬魚腹以為實者何哉然沈湘之事傳自司  
馬遷賈誼揚雄皆未嘗有異說漢去戰國未遠決非虛語也  
校定楚辭十卷翼騷一卷洛陽九詠一卷  
祕書郎昭武黃伯思長睿撰其序言屈宋諸騷皆書楚語作  
楚聲紀楚地名楚物故可謂之楚辭若些只羌諱蹇紛佗傑  
者楚語也悲壯頓挫或韻或否者楚聲也沅湘江澧修門夏  
首者楚地也蘭茝荃葍蕙若芷蘅者楚物也既以諸家本校  
定又以太史公屈原傳至陳說之序附以今序別為一卷曰  
以翼騷洛陽九詠者伯思所作也

總集類

文選六十卷

梁昭明太子蕭統德施撰唐崇賢館學士江都李善注北海  
太守邕之父也

六臣文選六十卷

唐工部侍郎呂延祚開元六年表上號五臣集注五臣者常  
山尉呂延濟都水使者劉承祖男良處士張銑呂向李周翰  
也以李善注惟引事不說意義故復為此注後人併與李善  
原注合為一書名六臣注東坡謂五臣乃俚儒之荒陋者反  
不及善如謝瞻詩苛隱暴三殤引苛政猛於虎以父與夫為  
殤非是然此說乃實本於善也

李善注此句但云苛猶虐也初不及三殤不審直齋之說何

所本隨齋批注

玉臺新詠十卷

陳徐陵孝穆集且為作序

古文苑九卷

不知何人集皆漢以來遺文史傳及文選所無者世傳孫洙巨源於佛寺經龕中得之唐人所藏也韓無咎類次為九卷刻之婺州中興書目有孔道文苑非此書孔道晉人本書百卷惟存十九卷爾又梁孝王忘憂館諸士之賦據題尚欠文鹿酒几三賦家有秦漢遺文七賦皆在常州有板本案忘憂公孫詭為文鹿賦鄒陽作酒賦文鹿酒止兩賦耳古文苑少文鹿酒几三賦原本作尚欠文鹿酒三賦脫去几字今改正

古文章十六卷

會稽石公輔編與前書相出入而稍多亦有史傳中鈔出者首卷為武王丹書其末蔡琰胡笳十八拍也館閣書目又有漢魏文章二卷集宋玉以下文八十八首未見

西漢文類四十卷

唐柳宗元之弟宗直嘗輯此書宗元為序亦四十卷唐藝文志有之其書不傳今書陶叔獻元之所編次未詳何人梅堯臣為之序

三國文類四十卷

不知何人所集

三謝詩一卷

集謝靈運惠連元暉不知何人集中興書目云唐庚子西

謝氏蘭玉集十卷

吳興汪閏集謝安而下子孫十六人詩三百餘篇聞熙寧六年進士序稱新天子即位丙寅之歲蓋元祐元年也

梁詞人麗句一卷

唐李商隱集梁明帝蕭歸而下十五人詩并鬼詩童謠

玉臺後集十卷

唐李康成集

篋中集一卷

唐元結次山錄沈千運趙微明孟雲卿張彪元季川于逖王李友七人詩二十四首盡篋中所有次之荆公詩選盡取不

遺唐中世詩高古如此今人乃專尚季末亦異矣館閣書目以為結自作入別集類何其不審也

國秀集三卷

唐國子進士芮挺章撰集李嶠至祖詠九十人詩二百二十首天寶三載國子進士樓穎為之序

搜玉小集一卷

自崔湜至崔融三十七人詩六十一首

賈氏聯珠集五卷

唐褚藏言所序賈氏兄弟五人詩各有小序曰國子祭酒常中行國子司業牟貽周容管經畧羣丹列婺州刺史庠胄卿武昌節度使鞏友封皆拾遺叔向之子也五人者惟羣以處

士薦入諫省庠以辟舉進餘皆進士科

唐御覽詩一卷

唐翰林學士令狐楚纂劉方平而下迄於梁鎰凡三十人詩二百八十九首一名唐新詩又名選進集又名元和御覽

河嶽英靈集二卷

唐進士殷璠集常建等詩二百三十四首

極元集一卷

唐姚合集王維至戴叔倫二十一人詩一百首曰此詩家射

鵬手也

姚氏殘語云殷璠為河嶽英靈集不載杜甫詩高仲武為中興間氣集不取李白詩顧陶為唐詩類選如元白劉柳杜牧

李賀張佑趙嘏皆不收姚合作極元集亦不收杜甫李白彼

必各有意也隨齋批注

中興間氣集二卷

唐渤海高仲武序集至德以後終於大曆饒起等二十六人詩一百三十二首各有小傳敘其大畧且拈提其警句而議

論文辭皆凡鄙

唐類表二十卷

不知集者館閣書目有李吉甫所集五十卷未之見也

斷金集一卷

唐令狐楚李逢吉自為進士以至宦達所與唱酬之詩開成

初裴夷直為之序案晁公武讀書志作令狐楚韓琪李逢吉所與酬唱詩什而唐志亦止載楚與逢吉

不著韓其姓氏

唐詩類選二十卷

唐太子校書郎顧陶集凡一千二百三十二首自為序大中

丙子歲也陶會昌四年進士

漢上題襟集三卷

唐段成式温庭筠逢皓案文獻通考作崔皎無逢皓余知古韋蟾徐商等

倡和詩什往來簡牘蓋在襄陽時也

松陵集十卷

唐皮日休陸龜蒙吳淞倡和詩也

本事詩一卷案唐書藝文志作一卷原本作十卷誤今改正

唐司勳郎中孟啟集

羣書麗藻六十五卷

按三朝藝文志一千卷崔遵度編中興館閣書目但有目錄五十卷云南唐司門員外郎崔遵度撰以六例總括古今之文一曰六籍瓊華二曰信使瑤英三曰玉海九流四曰集苑金鑾五曰絳闕藥珠六曰鳳首龍編為二百六十七門總一萬三千八百首今無目錄合之本共存此卷數斷續訛缺不復成書當其傳寫時固已如此矣其目止有四種無金鑾藥珠二類姑存之以備闕文按江南餘載遵度青州人居金陵高尚不仕中興書目云司門郎未知何據也

才調集十卷

後蜀韋穀集唐人詩

洞天集五卷

漢王貞範集道家神仙隱逸詩篇漢乾祐中也

煙花集五卷

蜀後主王衍集豔詩二百篇且為之序

文苑英華一千卷

太平興國七年命學士李昉扈蒙徐鉉宋白等閱前代文學撮其精要以類分之續又命蘇易簡王祐等至雍熙三年書成

唐文粹一百卷

兩浙轉運使合肥姚鉉寶臣撰鉉太平興國八年進士第三人在杭州與知州薛映不協映摭其罪狀數條密以聞當奪

一官特除名貶連州文學其自為序稱吳興姚鉉者蓋本郡望也

集選目錄二卷

案文獻通考集選作文選

丞相元獻公晏殊集中興館閣書目以為不知名者誤也大概欲續文選故亦及於庾信何遜陰鏗諸人而云唐人文章亦非也莆田李氏有此書凡一百卷力不暇傳姑存其目

唐百家詩選二十卷

王安石以宋次道家所有唐人詩集選為此編世言李杜韓詩不與為有深意其實不然按此集非特不及此三家而唐名人如王右丞韋蘇州元白劉柳孟東野張文昌之倫皆不在選意荆公所選特世所罕見其顯然其知者固不待選耶

抑宋次道家獨有此一百五集据而擇之他不復及耶未可

以臆斷也案晁公武讀書志宋敏求為三司判官嘗取其家所藏唐人一百八家詩選擇其佳者凡一千二百

四十六首為一編王介甫觀之因再有所去取且題曰欲觀唐詩者觀此足矣世遂以為介甫所纂也

四家詩選十卷

王安石所選杜韓歐李詩其置李於末而歐反在其上或亦

謂有所抑揚云

唐僧詩三卷

吳僧法欽集唐僧三十四人詩二百餘篇案文獻通考作楊傑次公為之序

傑次公為之序

名臣贊种隱君書啟一卷

祥符諸賢所與种放明逸書啟也首篇張司空齊賢書自敘

平生出處甚詳可以見國初名臣氣象

西崑酬唱集二卷

景德中館職楊億大年錢惟演希聖劉筠子儀唱和凡二百

四十七章亦有廣屬者共才五人所謂崑體者於此可見億

自為序

九僧詩一卷

九僧者希書保暹文兆行肇簡長惟鳳惠崇宇昭懷古凡一

百七首景德元年直昭文館陳克案文獻通考作陳充序目之曰琢玉

工以對姚合射鵬手九人惟惠崇有別集歐公詩話乃云其

集已亡惟記惠崇一人今不復知有九僧者未知何也

九僧者劍南希書金華保暹南越文兆天台行肇沃州簡長

青城惟鳳淮南惠崇江東宇昭峨媚懷古隨齋批注

寶刻叢章三十卷

宋敏求次道以四方碑刻詩文集為此編多有別集中所逸者

樂府集十卷題解一卷

題劉次莊中興書目直云次莊撰取前代樂府分類為十九門而各釋其命題之意按唐志樂類有樂府歌詩十卷者二有吳兢樂府古題要解一卷今此集所載止於陳隋人則當是唐集之舊而序文及其中頗及杜甫韓愈元白諸人意者次莊因舊而增廣之歟然館閣書目又自有吳兢題解及別出古樂府十卷解題一卷未可考也

樂府詩集一百卷

太原郭茂倩集凡古今號稱樂府者皆在焉其為門十有二首尾皆無序文中興書目亦不言其人今按茂倩侍讀學士勸仲褒之孫昭陵名臣也本鄆州須城人有子曰源案文獻通考郭勸有子曰源中源明原本脫明字今補正茂倩源中之子也但未詳其官位所至

和陶集十卷

蘇氏兄弟追和傳其注

仕塗必用集十卷

案文獻通考作二十一卷

吳郡祝熙載序云陳君材夫所編皆未詳何人錄景德以來人表牋雜文亦有熙載所撰者題為祝著作當是未改官制

前人也

汝陰唱和集一卷

元祐中蘇軾子瞻守穎與簽判趙令時德麟教授陳師道無已唱和晁說之以道爲之序李廌方叔後序案李方叔名廌原本作薦誤今

三家宮詞三卷

唐王建蜀花藥夫人本朝丞相王珪三人所著

五家宮詞五卷

石晉宰相和凝本朝學士宋白中大夫張公庠直祕閣周彥質及王仲修共五人各百首仲修當是王珪之子

本朝百家詩選一百卷

案文獻通考作五十七卷

太府卿曾慥端伯編官至太府卿編此所以續荆公之詩選而識鑒不高去取無法爲小傳略無義類議論亦凡鄙陸放翁以比中興間氣集謂相甲乙非虛語也其言歐王蘇黃不入選以擬荆公不及李杜韓之意荆公前選實不然余固言之矣

皇朝文鑑一百五十卷

呂祖謙編初淳熙丁酉孝廟因觀文海下臨安府校正刊行翰苑周必大夜直宣引偶及之因奏此書江佃類編案宋史作江佃殊無倫理書坊板行可耳恐難傳後莫若委館閣別加詮次遂以命祖謙既成賜名文鑑詔必大爲之序時祖謙已得末疾遂除直中祕且資銀絹各三百中書舍人陳騃駁之論皆

不行繼有近臣密啟云其所取之詩多言田里疾苦乃借舊  
作以刺今又所載章疏皆指祖宗過舉尤非所宜於是錢板  
之議亦寢周益公序既成材以遺呂一讀命藏之蓋亦未當  
乎呂之意也張南軒以為無補治道何益後學而朱晦庵晚  
歲嘗語學者曰此書編次篇篇有意每卷首必取一大文字  
作歷卷如賦取五鳳樓之類其所載奏議亦繫一時政治大  
節祖宗二百年規模與後來中變之意盡在其中非選粹比

也案每卷首必取一大文字以下原本脫去今據文獻通考補入

歷代確論一百一卷

不知何人集自三皇五帝以及五代凡有論述者隨世代編  
次

江西詩派一百三十七卷續派十三卷案宋史藝文志作呂本中江西宗派詩集一百

十五卷曾紘江西續宗派詩集二卷

自黃山谷而下三十五家又曾紘曾思父子詩詳見詩集類  
詩派之說本出於呂居仁前輩多有異論觀者當自得之

輶軒集一卷

鄱陽洪皓歷陽張邵新安朱弁使金得歸道間唱酬邵為之  
序

古今絕句二卷

吳說傳朋所書杜子美王介甫詩師禮之子王令逢原之外  
孫也

元真子漁歌碑傳集錄一卷

元真子漁歌世止傳誦其西塞山前一章而已嘗得其一時  
倡和諸賢之辭各五章及南卓柳宗元所賦通爲若干章因  
以顏魯公碑述唐書本傳以至近世用其詞入樂府者集爲  
一編以備吳興故事

艇齋師友尺牘二卷

南豐曾季狸裴父之師友往復書簡其子維輯而刻之自呂  
居仁徐師川以降下至淳熙乾道諸賢咸在焉裴父蕭然布  
衣而名流敬愛之若此足以知其人之賢而亦以見當時風  
俗之美也

膾炙集一卷

朝請郎嚴煥刻於江陰韓吏部而下雜文二十餘篇

唐人絕句詩集一百卷

洪邁景廬編七言七十五卷五言六言二十五卷各百首凡  
萬上之重華宮可謂博矣而多有本朝人詩在其中如李九  
齡郭震滕白王岳王初之屬其尤不深考者梁何仲言也

唐絕句選五卷

莆田柯夢得東海編所選僅一百六十六首去取甚嚴然人  
之好惡亦各隨所見耳

唐絕句選四卷

倉部郎中福清林清之直父以洪氏絕句鈔取其佳者七言  
一千二百八十五言百五十六六言十五首

攷德集三卷

强至所集韓魏公琦薨後時賢祭文挽詩

四家胡笳詞一卷

蔡玟劉商王安石李元白也

選詩七卷

文選中錄出別行以人之時代為次

宏辭總類四十一卷後集三十五卷第三集十卷第四集九卷

起紹聖乙亥迄嘉定戊辰皆刻於建昌軍學相傳紹興中太

守陸時雍所刻前集也餘皆後人續之戊辰以後時相不喜

此科主司務以艱僻之題困試者縱有記憶不遺文采可觀

輒復推求小疵以故久無中選者初紹聖設科但曰宏辭不

試制誥止於表檄露布誠諭箴銘頌記序九種亦不用古題

及大觀改曰詞學兼茂案宋史大觀改曰詞學兼茂去誠諭

及檄而益以制誥亦為九種四題而二題以歷代故事及紹

興始名博學宏辭復益以誥贊檄為十一種三日試六題各

一今一古遂為定制

古文關鍵二卷

呂祖謙所取韓柳歐蘇曾諸家文標抹注釋以教初學

迂齋古文標注五卷

宗正寺簿四明樓昉叔撰大畧如呂氏關鍵而所取自史

漢而下至於本朝篇目增多發明尤精當學者便之

歷代奏議十卷

呂祖謙集

國朝名臣奏議十卷

呂祖謙集凡二百篇

皇朝名臣奏議一百五十卷

丞相沂國忠定公趙汝愚編進時為蜀帥

續百家詩選二十卷

三衢鄭景龍伯允集以續曾慥前選凡慥所遺及在慥後者皆取之然其率畧尤甚

江湖集九卷

臨安書坊所刻本取中興以來江湖之士以詩馳譽者而方惟深子通承平人物晁公武子止嘗為從官乃亦在其中其餘亦未免玉石蘭艾混淆雜選然而士之不能自暴白於世

者或賴此以有傳書坊巧為射利未可以責備也

回文類聚三卷

桑世昌澤卿集以璇璣圖為初本而併及近世詩詞且以至道御製冠於篇首

滁陽慶厯集十卷後集十卷

朝散郎滁人徐徽仲元集斷自慶厯以來曾肇子開紹聖中謫守為之序其後集則吳珪

案宋史藝文志作珪張康朝王言恭案文獻通考作王彦恭所續宣和四年唐恪欽叟序之末及紹興蓋又後人

續人之爾

吳興詩一卷

熙寧中知湖州孫氏集而不著名以其時考之孫覺華老也

吳興分類詩集三十卷

雪川倪祖義子由編大抵以孫氏所集大畧而增廣之且併及近時諸公之作然亦病於太詳祖義齊齋之子少聰俊仕未達得年五十以死

會稽掇英集二十卷續集四十五卷

熙寧中郡守孔延之程師孟相繼纂集其續集則嘉定中汪綱俾郡人丁燧為之

潤州類集十卷

監潤州倉曹曾旼彥和纂始東漢終南唐

京口詩集十卷續二卷

鎮江教授熊克集開寶以來詩文本二十卷止刻其詩續又

得二卷自南唐而上曾所遺者補八十餘篇

嘉禾詩集一卷

不知集者

永嘉集三卷

亦不知何人集

天台集二卷別編一卷續集三卷

初李庚子長集本朝人詩為二卷未行太守李兼孟達得之又得郡士林師箴所輯前代之作為賦二詩二百乃以本朝人詩為續集而併刻焉別編則師箴之子表民所補也

括蒼集三卷後集五卷別集四卷續一卷

郡人吳飛英陳百朋相繼纂輯

山房書金角是  
卷十五  
釣臺新集六卷續集十卷

郡人王真集續者郡守謝德輿子上也

長樂集十四卷

福建提刑吳興俞向集

案文獻通考作俞尚

宣和三年序

清漳集三十卷

通判漳州趙不敵編

揚州詩集二卷

教授馬希孟編元豐四年秦觀作序

宣城集三卷

知宣州安平劉涇元符三年序

南州集十卷

太平州教授林桷子長集

南紀集五卷後集三卷

知漢陽軍于靈教授施士衡編其後集則教授鞏豐也

相江集三卷

案文獻通考作湘江

不知何人集相江者韶州曲江別名

長嶽集一卷

不知集者其首則御製記文也

桃花源集二卷又二卷

紹聖丙子四明田孳序清熙庚子縣令趙彥琇重編合為一

卷下卷則清熙以後所續

庾樓紀述三卷琵琶亭詩一卷

不知集者

東陽記詠四卷

亦不知集者

盤洲編二卷

洪丞相适兄弟子姪所賦園池詩也

瓊野錄一卷

學士洪邁園池記述題詠其曰瓊野者從維揚得瓊花植之而生遂以名圃

清暉閣詩一卷

史正志創閣於金陵僚屬皆賦詩

會稽紀詠六卷

汪綱仲舉帥越多所修創嚴陵洪璞每事為一絕廢者四人曰張漫王栒程震龍馮大章又有諸葛興為古詩二十篇蕭秋詩集一卷

玉山徐文卿斯遠作蕭秋詩四言九章章四句趙蕃昌甫而下和者十三人紹熙辛亥也趙汝談履常亦與焉後三十三年嘉定癸未乃序而刻之文卿晚第進士未授官而死有詩見江湖集

唐山集一卷後集三卷

卞園宋攸編唐山者臨安昌化縣也

後典麗賦四十卷

金華唐仲友與政編仲友以辭賦稱於時此集自唐末以及

本朝盛時名公所作皆在焉止於紹興間先有王戊集典麗賦九十三卷故此名後典麗賦王氏集未見

指南賦箋五十五卷指南賦經八卷

皆書坊編集時文止於紹熙以前

指南論十六卷又本前後二集四十六卷

淳熙以前時文

擢犀策一百九十六卷擢象策一百六十八卷


擢犀者元祐宣政以及建紹初年時文也擢象則紹興末大抵科舉場屋之文每降愈下後生亦不復識前輩之舊作姑存之以觀世變

文章正宗二十卷

參知政事真德秀希元撰自序正宗云者以後世文詞之多變欲學者識其源流之正也自昔集錄文章若杜預摯虞諸家往往湮沒不傳今行於世者惟梁昭明文選姚鉉文粹而已繇今既之二書所錄果得源流之正乎故今所集以明義理切世用爲主其體本乎古而旨近乎經者然後取焉否則辭雖工亦不錄其目凡四曰辭命曰議論曰敘事曰詩賦去取甚嚴

案此條原本脫漏今據文獻通考補入

直齋書錄解題卷十五



直齋書錄解題卷十六

宋陳振孫撰

別集類上

宋玉集一卷

楚大夫宋玉撰史記屈原傳言楚人宋玉唐勒景差之徒蓋皆原之弟子也而玉之辭賦獨傳至以屈宋並稱於後世餘人皆莫能及案隋志集三卷唐志二卷今書乃文選及古文苑中錄出者未必當時本也

枚叔集一卷

漢弘農都尉淮陰枚乘撰叔其字也隋志梁時有二卷亡唐志復著錄今本乃於漢書及文選諸書鈔出者

董仲舒集一卷

漢膠西相廣川董仲舒撰案隋唐志皆二卷今惟錄本傳中三策及古文苑所載士不遇賦詣公孫宏記室書二篇而已其叙篇略本傳語亦載古文苑仲舒平生著書如玉杯繁露清明竹林之類其泯沒不存多矣所傳繁露亦非本真也

劉中壘集五卷

漢中壘校尉劉向子政撰前四卷封事並見漢書九歎見楚辭末請雨華山賦見古文苑

揚子雲集五卷

漢黃門郎成都揚雄子雲撰大抵皆錄漢書及古文苑所載案宋玉而下五家皆見唐以前藝文志而三朝志俱不著錄

崇文總目僅有董集一卷而已蓋古本多已不存好事者於史傳類書中鈔錄以備一家之作充藏書之數而已

二十四箴一卷

揚雄撰今廣德軍所刊本校集中無司空尚書博士太常四箴集中所有皆據古文苑而此四箴或云崔駰或云崔子玉疑不能明也

蔡中郎集十卷

後漢左中郎將陳留蔡邕伯喈撰唐志二十卷今本闕亡之外纔六十四篇其間有稱建安年號及爲魏宗廟頌述者非邕文也卷末有天聖癸亥歐陽靜所書辨證甚詳以爲好事者雜編他人之文相混非本書

陳思王集二十卷

魏陳王曹植子建撰卷數與前志合其間亦有采取御覽書鈔類聚諸書中所有者意皆後人附益然則亦非當時全書矣其間或引摯虞流別集此書國初已亡猶是唐人舊傳也

陳孔璋集十卷

魏丞相軍謀掾廣陵陳琳孔璋撰案魏志文帝為五官中郎將及平原侯植皆好文學山陽王粲仲宣北海徐幹偉長廣陵陳琳孔璋陳留阮瑀元瑜汝南應瑒德璉東平劉植公幹並見友善自邯鄲滹繁欽路粹丁廙楊修荀綽等亦有文采而不在此七人之列世所謂建安七子者也但自王粲而下纔六人意子建亦在其間耶而文帝典論則又以孔融居其

首并粲琳等謂之七子植不與焉今諸家詩文散見於文選及諸類書其以集傳者仲宣子建孔璋二人而已余家亦未有仲宣集

阮步兵集十卷

魏步兵校尉陳留阮籍嗣宗撰籍瑀之子也

嵇中散集十卷

魏中散大夫譙嵇康叔夜撰本姓奚自會稽徙譙之銍縣嵇山家其側遂氏焉取稽字之上志其本也案晉書本傳銍縣有嵇山家於其側因而命氏此云取稽字之上蓋以嵇與稽字體相近為不忘會稽之意文獻通攷作取嵇恐誤所著文論六七萬言今存于世者僅如此唐志猶有十五卷

張司空集三卷

晉司空范陽張華茂先撰前一卷爲四言五言詩後一卷爲祭祝哀誄等文

陸士衡集十卷

晉平原內史吳郡陸機士衡撰

陸士龍集十卷

晉清河內史陸雲士龍撰太康平吳二陸入洛張茂先所謂利獲二俊者也遜抗之後而有機雲可謂代不乏人矣然皆不免其身才者身之累也況居亂世乎機好遊權門抑又有以取之耶

劉司空集十卷

晉司空中山劉琨越石撰前五卷差全可觀後五卷闕誤或

一卷數行或斷續不屬殆類鈔節者末卷劉府君誄尤多訛未有別本可以正

陶靖節集十卷

晉彭澤令潯陽陶潛淵明撰或云淵明字元亮大司馬侃曾孫自號五柳先生世稱靖節徵士

陶靖節年譜一卷年譜辨證一卷雜記一卷

吳郡吳仁傑斗南爲年譜蜀人張縝季長辨證之又雜記前賢論靖節語此蜀本也卷末有陽休之宋庠序錄私記又有治平三年思悅題稱永嘉示以宋丞相刊定之本思悅者不知何人也

鮑參軍集十卷

宋前軍行參軍東海鮑照明遠撰世多云鮑昭以避唐武后諱也沈約宋書李延壽南史皆作鮑照而館閣書目直以為鮑昭且云上黨人非也

謝宣城集五卷

齊中書郎陳郡謝朓元暉撰集本十卷樓炤知宣州止以上五卷賦與詩刊之下五卷皆當時應用之文衰世之事可采者已見本傳及文選餘視詩劣焉無傳可也

孔德璋集十卷

案文獻通攷作一卷

齊太子詹事山陰孔稚圭德璋撰北山移文其所作也

沈約集十五卷別集一卷又九卷

梁特進吳興沈約休文撰約有文集百卷今所存惟此而已

十五卷者前二卷為賦餘皆詩也別集雜錄詩文不分卷九卷者皆詔草也館閣書目但有此九卷及詩一卷凡四十八首

昭明太子集五卷

梁太子蕭統德施撰

何仲言集三卷

案文獻通攷作二卷

梁水部郎何遜仲言撰本傳集八卷館閣書目同今所傳止

此

江文通集十卷

梁散騎常侍江淹文通撰

庾開府集二十卷

正齊書金角是 卷一六  
周司憲中大夫南陽庾信子山撰信肩吾之子仕梁及周其在揚都有集四十卷及江陵又有三卷皆兵火不存今集止自入魏以來所作而哀江南賦寔爲首冠

稽聖賦三卷

北齊黃門侍郎琅邪顏之推撰其孫師古注蓋擬天問而作中興書目稱李瀆風注

唐太宗集三卷

唐太宗皇帝本集四十卷館閣書目但有詩一卷六十九首而已今此本第一卷賦四篇詩六十五首後二卷爲碑銘書詔之屬而訛謬頗多世所傳太宗之文見於石刻者如帝京篇秋日效庾信體詩三藏聖教序皆不在又晉書紀傳論稱

制曰者四皆太宗御製也今獨載宣武二紀論而陸機王羲之傳論不預焉宣紀論復重出其他亦多有非太宗文者雜廁其中非善本也

東臯子五卷

唐大樂丞太原王績無功撰績文中子王通仲淹之弟也仕隋爲正字嗜酒簡放不樂仕進晚以大樂史焦革善釀求爲其丞不問流品亦阮嗣宗步兵之意也革死乃歸於所居立杜康祠爲文祭之以焦革配自號東臯子其友呂才鳩訪遺文編成五卷爲之序有醉鄉記傳於世其後陸瀆又爲後序

盧照鄰集十卷

唐新都尉范陽盧照鄰撰以久病自沈潁水

駱賓王集十卷

唐臨海丞義烏駱賓王撰賓王後為徐敬業傳檄天下罪狀武后所謂一抔之土未乾六尺之孤安在者也其首卷有魯國鄒雲卿序言賓王光宅中廣陵亂伏誅莫有收拾其文者後有勅搜訪雲卿撰焉又有蜀本卷數亦同而次序先後皆異序文視前本加詳而云廣陵起義不捷因致遁逃文集散失中宗朝詔令搜訪案本傳言賓王既敗亡命不知所之與蜀本序合

陳拾遺集十卷

唐右拾遺射洪陳子昂伯玉撰黃門侍郎盧藏用為之序又有別傳系之卷末子昂仕武后既不遇以父喪家居縣令段

簡貪暴取貨弗厭致之獄以死年財四十二子昂為明堂議神鳳頌納忠貢諛於孽后之朝大節不足言矣然其詩文在唐初寔首起八代之衰者韓退之薦士詩言國朝盛文章子昂始高蹈非虛語也盧序亦簡古清壯非唐初文人所及

宋之問集十卷

唐越州長史河汾宋之問延清撰

沈佺期集十卷

案文獻通攷作五卷

唐中書舍人內黃沈佺期雲卿撰自沈約以來始以音韻對偶為詩至之問佺期益加靡麗學者宗之號為沈宋唐律蓋本於此二人者皆以詔附二張進景龍中俱為修文館學士佺期回波詞有所謂齒錄牙緋者其為人可知之問尤反覆

無行卒以罪死

張燕公集三十卷

唐宰相范陽張說說之撰一字道濟與蘇頲號燕許大手筆家未有蘇許公集二人名相而以文擅天下盛矣哉

曲江集二十卷

唐宰相曲江張九齡子壽撰曲江本有元祐中郡人鄧開序自言得其文於公十世孫蒼梧守唐輔而刊之於末附以中書舍人樊子彥所撰行狀會稽公徐浩所撰神道碑及太常博士鄭宗珍議諡文獻狀蜀本無之

王右丞集十卷

唐尚書右丞河中王維摩詰撰建昌本與蜀本次序皆不同

大抵蜀刻唐六十家集多異于他處本而此集編次尤無倫維詩清逸追逼陶謝輞川別墅圖畫摹傳至今嘗與裴迪同賦各二十絕句集中又有與迪書略曰夜登華子岡輞水淪漣與月上下寒山遠火明滅林外深巷寒犬吠聲如豹村墟夜春復與疎鐘相聞此時獨坐僮僕靜默每思曩昔攜手賦詩當待春中卉木蔓發輕條出水白鷗矯翼露濕青臯麥雉朝雊儻能從我遊乎余每讀之使人有飄然獨往之興迪詩亦佳然他無聞於世蓋亦高人也輞川在藍田縣西南二十里本宋之問別圃維後表爲清源寺終墓其西

龍筋鳳髓判十卷

唐司門員外郎陸澤張鷟文成撰鷟調露中進士事跡見張

薦傳薦之祖也唐以書判拔萃科選士此集凡百題自省臺寺監百司下及州縣類事屬辭蓋待選預備之具也驚自號浮休子

李翰林集三十卷

案解題中所云應作三十卷原本脫十字今校補

唐翰林供奉廣漢李白撰唐志有草堂集二十卷者李陽冰所錄也今案陽冰序文但言十喪其九而無卷數又樂史序文稱李翰林集十卷別收歌詩十卷因校勘為二十卷又於館中得賦序表書贊頌等亦為十卷號曰別集然則三十卷者樂史所定也家所藏本不知何處本前二十卷為詩後十卷為雜著首載陽冰史及魏顥曾鞏四序李華劉全白范傳正裴敬碑誌卷末又載新史本傳而姑孰十詠笑矣悲來草

書三歌行亦附焉復著東坡辨證之語其本最為完善別有蜀刻大小二本卷數亦同而首卷專載碑序餘二十三卷歌詩而雜著止六卷有宋敏求後序言舊集歌詩七百七十六篇又得王溥及唐魏萬集本因哀唐類詩諸編洎石刻所傳廣之無慮千篇以別集雜著附其後曾鞏蓋因宋本而次第之者也以校舊藏本篇數如其言然則蜀本即宋本也耶末又有元豐中毛漸題云以宋公編類之勤曾公攷次之詳而晏公又能鏤板以傳於世乃晏知止刻於蘇州者然則蜀本蓋傳蘇本而蘇本不復有矣

杜工部集二十卷

唐左拾遺檢校工部員外郎劔南節度參謀襄陽杜甫子美

元次山集十卷  
撰案唐志六十卷小集六卷王洙原叔蒐哀中外書九十九卷除其重複定取千四百五篇古詩三百九十九近體千有六起太平時終湖南所作視居行之次若歲時爲先後別錄雜著爲二卷合二十卷寶元二年記遂爲定本王琪君玉嘉祐中刻之姑蘇且爲後記元稹墓銘亦附第二十卷之末又有遺文九篇治平中太守裴集刊附集外蜀本大略同而以遺文入正集中則非其舊也世言子美詩集大成而無韻者幾不可讀然開天以前文體大略皆如此若三大禮賦辭氣壯偉又非唐初餘子所能及也

校定杜工部集二十二卷

祕書郎黃伯思長睿所校既正其差誤參歲攷月出處異同

古律相間凡一千四百十七首

案文獻通攷作一千四百四十七首雜著二十

九首別爲二卷李丞相伯紀爲序之

賈幼幾集十卷

唐起居舍人河南賈至幼幾撰唐志二十卷別十五卷李淑書目云至集有三本又有十卷者有序今本無序中興館閣本亦同

元次山集十卷

唐容管經略使河南元結次山撰蜀本但載自序江州本以李商隱所作序冠其首蜀本拾遺一卷中興頌五規二惡之屬皆在焉江本分寘十卷結自號漫叟

顏魯公集十五卷補遺一卷附錄一卷

唐太子太師京兆顏真卿清臣撰之推五世孫師古曾侄孫  
案館閣書目嘉祐中宋敏求惜其文不傳乃集其刊於金石  
者爲十五卷今本序文劉敞所作乃云吳興沈侯編輯而不  
著沈之名劉元剛刻於永嘉爲後序則云劉原父所序卽宋  
次道集其刻於金石者也不知何據元剛復爲之年譜益  
以拾遺一卷多世所傳帖語且以行狀碑傳爲附錄魯公之  
裔孫裕自五代時官温州與其弟倫祥案文獻通考倫作綸皆徙居永  
嘉樂清本朝世復其家且時褒錄其子孫亦有登科者

蕭功曹集十卷

唐揚州功曹參軍蕭穎士茂挺撰門人柳弁爲序穎士梁鄱  
陽王之裔敏悟夙成負才尙氣見惡於李林甫其後卒不遇

以死壽亦不逮中年

毛欽一集二卷

唐荊州長林毛欽一撰長林荆門軍屬縣欽一上諸公書自  
稱毛欽一字傑或時又以傑爲名唐人以字行者多矣自號  
雲夢子開元中人

吳筠集十卷

唐嵩陽觀道士華陰吳筠貞節撰筠舉進士不中第天寶初  
召至京師爲道士待詔翰林爲高力士所惡而斥後入剡中  
天台卒弟子諡爲宗元先生事見隱逸傳傳稱筠所善孔巢  
父李白歌詩相甲乙巢父詩末之見也筠詩固不碌碌豈能  
與太白相甲乙哉

獨孤常州集二十卷

唐常州刺史洛陽獨孤及至之撰其門人梁肅編集為後序而李舟為序於篇首且刻崔祐甫所為墓志其子曰郁字古風者亦有名韓退之志其墓

高常侍集十卷

唐左散騎常侍渤海高適達夫撰適年五十始為詩即工部子美所善也豪傑之士亦何所往而不能也

劉隨州集十卷

唐隨州刺史宣城劉長卿文房撰詩九卷末一卷雜著數篇而已建昌本十卷別一卷為雜著長卿開元二十一年進士

劉虞部集十卷

唐虞部郎中劉商子夏撰武元衡為之序集中有送弟歸懷州舊業序言高祖當武德經綸勲在王府案武德功臣有劉文靖宏基政會史皆有傳文靜之後誅絕宏基政會傳後無所攷未詳何人之後也胡笳十八拍行於世

戎昱集五卷

案文獻通攷作三卷

唐虔州刺史扶風戎昱撰其姪孫為序言弱冠謁杜甫於渚宮一見禮遇集中有吳甫詩世所傳在家貧亦好之句昱詩也

梁補闕集二十卷

唐右補闕翰林學士安定梁肅敬之撰崔恭為之序首稱其從釋氏為天台大師元浩之弟子今案獨孤及集後序稱門

下生頗述師承之意韓愈亦言其佐助陸相貢士所與及第者皆赫然而聞然則梁固名儒善士也而獨以爲師從釋氏者何哉

陸宣公集二十二卷

唐宰相嘉興陸贄敬輿撰權德輿爲序稱制誥集十三卷奏草七卷中書奏議七卷今所存者翰苑集十卷榜子集十二卷序又稱別集文賦表狀十五卷今不傳

權丞相集五十卷

唐宰相略陽權德輿載之撰楊嗣復爲序德輿父皐以不汙祿山見卓行傳其子璩爲中書舍人劾李訓傾覆亦能世其家性寬和有體文亦純雅宏贍三世名迹可謂德門矣墓

碑韓昌黎所爲也序又言九年掌誥自纂錄爲五十卷不在此集內今未之見

裴晉公集二卷

唐宰相河東裴度中立撰

昌黎集四十卷外集十卷

唐吏部侍郎南陽韓愈退之撰李漢序漢文公婿也其言辱知最厚且親收拾遺文無所失墜者懼後之人僞妄輒附益其中也外有註論語十卷傳學者順宗實錄五卷列於史官不在集中今實錄在外集然則世所謂外集者自實錄外皆僞妄或韓公及其婿所刪去也南陽者唐東都之河陽春秋傳晉於是始啟南陽者也新書以爲鄧州非是方崧卿年譜

辨之詳矣

韓文公志五卷

金堂樊汝霖澤之撰汝霖嘗為韓集譜注四十五卷又集其碑誌祭文序譜之屬為一編此是也譜注未之見汝霖宣和六年進士仕至瀘帥以卒玉山汪端明志其墓

昌黎集四十卷外集一卷附錄五卷年譜一卷舉正十卷外鈔八卷

年譜洪興祖撰莆田方崧卿增攷且撰舉正以校其同異而刻之南安軍外集但據嘉祐蜀本劉煜所錄二十五篇而附以石刻聯句詩文之遺見於他集者及葛嶠刻柳文則又以大庾丞韓郁所編注諸本號外集者案文獻通攷作韓郁并攷校疑誤

輯遺事共為外鈔刻之

校定韓昌黎集四十卷外集十卷

晦庵朱侍講熹以方氏本校定凡異同定歸于一多所發明有益後學外集皆如舊本獨用方本益大顛三書愚案方氏用力於此集勤矣外集刪削甚嚴而存此書以見其邀速常語初無崇信之說但欲明世間問答之偽而不悟此書為偽之尤也蓋由歐陽公跋語之故不知歐陽公自以易大傳之名與已意合從而實之此自通人之一蔽東坡固嘗深辨之然其謬妄三尺童子所共識不待坡公也今朱公決以為韓筆無疑方氏未足責晦翁識高一世而其所定者迺爾殆不可解今案外鈔第七卷曰疑誤者韓郁注云潮州靈山寺所

刻末云吏部侍郎潮州刺史者非也退之自刑部侍郎貶潮  
晚乃由兵部爲吏部流俗但稱韓吏部爾其書蓋國初所刻  
故其謬如此又潮本韓集不見有此書使靈山舊有此刻集  
時何不編入可見此書妄也然其妄甚白亦不待此而明

柳柳州集四十五卷外集二卷

唐禮部員外郎柳州刺史河東柳宗元子厚撰劉禹錫作序  
言編次其文爲三十二通退之之誌若祭文附第一通之末  
今世所行本皆四十五卷又不附誌文非當時本也或云沈  
元用所傳穆伯長本

柳先生集四十五卷外集二卷別錄一卷案文獻通攷作二卷摭異一卷  
音釋一卷附錄二卷事迹本末一卷

方崧卿旣刻韓集於南安軍其後江陰葛嶠爲守復刊柳集  
以配之別錄而下皆嶠所裒集也別錄者龍城錄及法言注  
五則龍城近世人僞作

重校添注柳文四十五卷外集二卷

姑蘇鄭定刊於嘉興以諸家所注輯爲一編曰集注曰補注  
曰章曰孫曰韓曰張曰董氏而皆不著其名其曰重校曰添  
注則其所附益也

韓柳音辨二卷

南劍州教授新安張敦頤撰紹興八年進士也

李元賓集五卷

唐太子校書江東李觀元賓撰觀與韓退之貞元八年同年

進士明年試博學宏詞觀中其科而愈不在選顏子不貳過  
論其年所試文也又一年觀年二十九卒愈爲之誌銘使觀  
不死可量也哉陸希聲得其文二十九篇爲之序慶歷中章  
譽又得十四首於楚人趙昂通爲五卷

歐陽行周集五卷

唐國子四門助教莆田歐陽詹行周撰詹亦韓愈同年進士  
故其集中各有明水賦詹亦早死愈爲之哀詞尤拳拳焉李  
翱作傳而李集不載其序福建廉使李貽孫所爲也詹之爲  
人有哀辭可信矣黃璞何人斯乃有太原函髻之謗好事者  
喜傳之不信愈而信璞異哉高城已不見之句樂府此類多  
矣不得以爲實也然高城已不見之詩題云途中寄太原所

思蓋亦有以召其疑也昔人以曖昧受謗傳之千古尙未能  
明孰謂今人行已而可不謹哉

元氏長慶集六十卷

唐宰相河南元稹微之撰中興書目止四十八卷又有逸詩  
二卷稹嘗自彙其詩爲十體其末爲豔詩暈眉約鬢匹配色  
澤劇婦人之怪豔者今世所傳李娃鶯鶯夢遊春古決絕句  
贈雙文示楊瓊諸詩皆不見於六十卷中意館中所謂逸詩  
者卽其豔體者耶稹初與白樂天齊名文章相上下出處亦  
不相悖晚而欲速化依奄宦得相卒爲小人之歸而居易終  
始全節嗚呼爲士者可以鑒矣

白氏長慶集七十一卷年譜一卷又新譜一卷

唐太子少傅太原白居易樂天撰案集後記稱前著長慶集五十卷元微之爲序後集二十卷自爲序今又續後集五卷自爲記前後七十五卷時會昌五年也墓志乃云集前後七十卷當時預爲誌時未有續後集今本七十一卷蘇本蜀本編次亦不同蜀本又有外集一卷往往皆非樂天自記之舊矣年譜維揚李璜德劭所作樓天防參政得之以遺吳郡守李伯珍諫議刻之余嘗病其疎略牴牾且號爲年譜而不繫年乃別爲新譜刊附集首

### 白集年譜一卷

知忠州漢嘉何友諒以居易舊治旣刊其文集又作年譜刊之集首始余爲譜旣成妹夫王栒叔永守忠錄寄之則忠已

### 劉賓客集三十卷外集十卷

唐檢校禮部尙書兼太子賓客中山劉禹錫夢得撰集本四十卷逸其十卷常山宋次道袁輯其遺文得詩四百七篇雜文二十二篇爲外集然未必皆十卷所逸也

### 李文公集十卷

案文獻通攷作十八卷

唐山南東道節度使李翱習之撰蜀本分二十卷集中無詩獨有戲贈一篇拙甚決非其作也然韓集遠遊聯句有習之一聯云前之詎灼灼此去信悠悠亦殊不工他無一語意者

於詩非所長而不作耶習之為文源委於退之可謂得其傳矣但其才氣不能及耳

樊宗師集一卷絳守園池記注一卷

唐諫議大夫南陽樊宗師紹述撰韓文公為墓誌稱魁紀公三十卷樊子三十卷詩文十篇今所存纔數篇耳讀之殆不可句有王晟者天聖中為絳倅取其園池記章解而句釋之猶有不盡通者孔子曰辭達而已矣為文而晦澁若此其湮沒弗傳也宜哉

書以魁紀公名異甚文之不可句當亦類是隨齋批注

皇甫持正集六卷

唐工部郎中新定皇甫湜持正撰東都修福先寺碑三千字

一字索三縑素原本無一字二字今據文獻通攷補正其輕傲不羈非裴晉公鉅德殆不能容之也今集纔數十篇碑不復存意其多所亡逸然湜之矜負如此固不苟為人作人亦未必敢求之也

林藻集一卷

唐嶺南節度副使莆田林藻緯乾撰藻貞元七年進士試珠還合浦賦叙珠去來之意人謂有神助焉

林蘊集一卷

唐邵州刺史林蘊復夢撰藻之弟也見儒學傳蘊父披蘇州別駕有子九人世號九牧林氏其族至今衣冠詩禮以蘊所為父墓碑攷之其八子為刺史司馬其一號處士而披之父為饒陽郡守祖為瀛州刺史蓋亦盛矣

直齋書金角是

卷一六

沈下賢集十二卷

案文獻通攷作十卷

唐福建團練副使吳興沈亞之下賢撰元和十年進士仕不出藩府長慶中爲櫟陽尉案唐詩紀事及文獻通攷俱作樂陽太和中謫掾郢州皆集中可見者也吳興者著郡望其實長安人

孟東野集十卷

唐溧陽尉武康孟郊東野撰惟末卷有書一篇贊一篇餘皆詩也郊貞元十二年進士

呂衡州集十卷

唐衡州刺史河中呂溫和叔撰一字化光劉禹錫爲序溫本善葦執誼王叔文偶使絕域得免在八司馬之數而終以好利敗與竇羣羊士諤昵比傾誣宰相李吉甫謫死履校不懲

至於滅耳此其所以爲小人歟

會昌一品集二十卷別集十卷外集四卷

唐宰相趙郡李德裕文饒撰一品集者皆會昌在相位制誥詔冊表疏之類也別集詩賦雜著外集則窮愁志也德裕自穆宗時已掌內外制累踐方鎮遂相文宗平生著述詎止此此外有姑臧集五卷而已其不傳於世者亦多矣窮愁志晚年遷謫後所作凡四十九篇其論精深其詞峻潔可見其英偉之氣周秦行紀一篇奇章怨家所爲而文饒遂信之爾

李衛公備全集五十卷年譜一卷摭遺一卷

比永嘉及蜀本三十四卷之外有姑臧集五卷獻替記辨謗略等諸書共十一卷知鎮江府江陰耿秉直之所輯并攷次

直齋書錄解題卷十六  
爲年譜摭遺姑臧集者兵部員外郎段令緯所集前四卷皆  
西掖北門制草末卷惟黠戛斯朝貢圖及歌詩數篇其曰姑  
臧未詳衛公三爲浙西出入十年皆治京口故乘直刻其集  
若永嘉則其事頗異郡故有海神廟本城北隅叢祠元祐中  
太守范岫夢其神自言李姓唐武宗時宰相南遷以沒寤而  
意其爲德裕訪得其祠遂作新廟且列上其事自是日盛賜  
廟額封王爵然衛公平生於溫蓋邈乎不相及也殊有不可  
曉者

平泉雜文一卷

卽別集第九第十卷平泉山居所作詩賦記也

樊川集二十卷外集一卷

唐中書舍人京兆杜牧牧之撰牧佑之孫其甥裴延翰編而  
序之外集皆詩也又在天台錄得集外詩一卷別見詩集類  
未知是否牧才高俊邁不羈其詩豪而艷有氣槩非晚唐人  
所能及也

李義山集八卷樊南甲乙集四十卷

唐太學博士河內李商隱義山撰商隱令狐楚客開成二年  
進士書判入等從王茂元鄭亞辟二人皆李德裕所善坐此  
爲令狐綯所憾竟坎壈以終甲乙集者皆表章啟牒四六之  
文旣不得志於時歷佐藩府自茂元亞之外又依盧宏正柳  
仲郢故其所作應用若此之多商隱本爲古文令狐楚長於  
章奏遂以授商隱然以近世四六觀之當時以爲工今未見

其工也

玉溪生集三卷

案文獻通攷作二卷

李商隱自號此集即前卷中賦及雜著也

孫樵集十卷

案文獻通攷作三卷

唐職方郎中孫樵可之撰自為序凡三十五篇蓋其刪擇之餘也樵大中九年進士東坡嘗曰學韓愈而不至者為皇甫湜學湜而不至者為孫樵

李甘文集一卷

唐侍御史李甘和鼎撰甘欲壞鄭注麻坐貶死杜牧所為賦詩者也

薛逢四六集一卷

唐祕書監河東薛逢陶臣撰

勅語堂判集一卷

唐宰相滎陽鄭畋台文撰

文泉子十卷

唐中書舍人長沙劉蛻復愚撰自為序云覃以九流之旨配以不竭之義曰泉有文塚銘甚奇蛻大中四年進士其為西掖在咸通時

一鳴集十卷

案文獻通攷作三十卷

唐兵部侍郎虞鄉司空圖表聖撰

案虞鄉即今解州原本作虞卿誤今改正圖見

卓行傳唐末高人勝士也蜀本但有雜著無詩自有詩十卷別行詩格尤非晚唐諸子所可望也其論詩以梅止於酸鹽

止於鹹鹹酸之外醇美乏焉東坡嘗以為名言自號知非子  
又曰耐辱居士

文藪十卷

唐太常博士襄陽皮日休龔美撰日休咸通八年進士黃巢  
之難陷賊中為果頭三屈律之讖賊疑譏已髮拳遂見害陸  
游筆記以皮光業碑辨其不然

笠澤叢書四卷補遺一卷

唐處士吳郡陸龜蒙魯望撰為甲乙丙丁詩文雜編政和中  
朱衮刊之吳江末有四賦用蜀本增入

笠澤叢書蜀本十七卷

宋文獻通考作七卷

元符中鄂人樊開所序龜蒙自號天隨子甫里先生江湖散

人與皮日休善有松陵倡和集皆不在文藪叢書中

羅江東甲乙集十卷後集五卷湘南集三卷

唐鄉貢進士新城羅隱昭諫撰隱舉進士不第更辟諸鎮幕  
府羅紹威待以從叔晚依吳越奏授給事中甲乙集皆詩後  
集有律賦數首湘南集者長沙幕中應用之文也隱又有淮  
海寓言讒書等求之未獲

讒書刊于新城縣

隨齋批注

投知小錄三卷

唐神策判官邵陽秦韜玉中明撰田令孜客中和二年特賜  
及第

鳳策聯華三卷

唐虞部郎中淮南從事秋浦顧雲垂象撰多以擬古爲題蓋行卷之文也雲咸通十五年進士

聱書十卷

唐天復進士沈顏可鑄撰傳師之孫仕僞吳順義中爲翰苑名聱者以元結聱叟自況也其文骯骯而自序之語極其矜負

李後主集十卷

江南國主李煜重光撰

田霖四六集一卷


南唐田霖撰

扈載集十卷

後周翰林學士范陽扈載仲熙撰少俊早達年三十六以死其子蒙顯於國初

直齋書錄解題卷十六

直齋書錄解題卷十六



直齋書錄解題卷十七

宋陳振孫撰

別集類中

趙韓王遺稿十卷

丞相韓忠獻王范陽趙普則平撰普開國元臣不以文著而  
彗星班師之疏天下至今傳誦未有劉昌言所撰行狀案館  
閣書目惟有奏議一卷今麻沙書坊刊本奏議止數篇餘皆  
表狀之屬也

徐常侍集三十卷

左散騎常侍廣陵徐鉉鼎臣撰其二十卷仕江南所作餘十  
卷歸朝後所作也所撰李煜墓銘婉嫩有體文鑑取之

直齋書錄解題卷十七

咸平集五十一卷

右諫議大夫漢嘉田錫表聖撰太平興國三年進士第二人  
范文正公誌其墓東坡序其奏議十篇所謂憂治世而危明  
主者也今首卷有奏議十二篇即東坡所序案此句原本脫去今據文獻通  
攷增錫之子孫入顯者端平初南充游似景仁為成都漕原  
本作爲成憲今據奏言朝廷方用端拱咸平之舊紀元而臣  
文獻通考改正之部內乃有端拱咸平之直臣宜褒表之以示勸願下有司  
議諡博士徐清叟直翁考功黃朴誠甫議諡曰獻翼云今漢  
嘉田氏子孫不知存亡而文集板之在州者亦燬於兵燹矣  
可爲永慨

廣平公集一百卷

翰林學士文安公大名宋白太素撰

柳仲塗集十五卷

如京使大名柳開仲塗撰開寶六年進士歷知常潤州以  
殿中侍御史換崇儀使又歷八郡以卒門人張景為行狀及  
集序本朝為古文自開始然其體艱澁為人忼慨喜功名急  
義史亦稱其傲狠強憤云

穆參軍集三卷

泰州司法參軍東平穆脩伯長撰修祥符二年經明行脩進  
士仕不遇困窮以死師事陳搏傳其易學以授李之才之才  
傳邵雍而尹洙兄弟亦從之學古文且傳其春秋學或曰太  
極圖亦脩所傳於陳搏種放者今其遺文傳世者僅如此門

人祖無擇爲之序

江南小集二卷

工部侍郎終南种放明逸撰淳化中有李介者序之於九江故以爲名館閣書目別有正集十卷大略與此同原註正集名豹林

小畜集二十卷外集二十卷

知制誥濟陽王禹偁元之撰自爲之序略曰閱平生所爲文類而第之得三十卷將名其集以易筮之遇乾之小畜象曰君子以懿文德未能行其施但可懿文而已外集者其曾孫汾哀輯遺文得三百四十首又有承明集十卷奏議集二卷

後集詩二卷未見

案宋史藝文志無奏議集後集詩而有別集十六卷

乖崖集十二卷附錄一卷

樞密直學士忠定公郵城張詠復之撰

案宋史詠字復之原本作詠之誤今改正

乖崖其自號也錢希白爲墓誌韓魏公爲神道碑近時郭森卿宰崇陽刻此集舊本十卷今增廣并語錄爲十二卷

武夷新集二十卷別集十二卷

翰林學士文公浦城楊億大年撰案本傳所著括蒼武夷頽陰韓城退居汝陽蓬山冠鰲等集及內外制刀筆共一百九十四卷館閣書目猶有一百四十六卷今所有者惟此而已武夷新集者億初入翰苑當景德丙午明年條次十年詩筆而序之別集者祥符五年避讓佯狂歸陽翟時所作也君可思賦居其首亦見本傳餘書疏皆作其弟倚酬答倚亦景德

中進士

中山刀筆集三卷

翰林學士大名劉筠子儀撰皆四六應用之文筠與楊大年同時號楊劉詩號西崑體別有珣府應言集十卷榮遇集十二卷表奏六卷淝川集四卷見館閣書目

滑稽集四卷

翰林學士吳越錢易希白撰多譎諷之詞淳化癸巳自序

擁旄集五卷伊川集五卷

案文獻通攷作三卷

樞密使思公吳越錢惟演希聖撰易侗之子惟演俶之子也惟演文集甚多此特其二集爾出鎮河陽河南時所作也全集未見

臨川集三十卷二府集二十五卷年譜一卷

丞相臨淄元獻公臨川晏殊同叔撰其五世孫大正為年譜言先元獻嘗自差次起儒館至學士為臨川集起樞廷至宰席為二府集今案本傳有文集二百四十卷中興書目亦九十四卷今所刊止此爾臨川集有自序

夏文莊集一百卷

樞密使鄭國文莊公九江夏竦子喬撰竦父死王事身中賢科工為文辭復多材術而不自愛重甘心姦邪聲伎之盛冠於承平夫婦反目陰慝彰播皆可為世戒也

呂文靖試卷一卷

丞相許國文靖公壽春呂夷簡坦夫撰咸平二年壽州應舉此其程文也真本藏范太史氏前有家狀大略與今同其所

習曰春秋何論大義何論者當是何晏論語也其所問各十條皆非深義逐條所答纔數句或止一言或直稱未審考官二人花書其上并批通不又禮行於郊賦建侯置守孰優論其所習又稱雜文時務策則不復存此可以見國初場屋事體文法簡寬士習消茂得人之盛後世反不能及文盛則實衰世變蓋可觀矣

范文正集二十卷別集四卷

參政文正公吳郡范仲淹希文撰祥符八年進士曰朱說者即公也幼孤從其母適朱氏其為兗州推官始復姓更名

范文正尺牘五卷

其家所傳在正集之外

安陽集五十卷

丞相魏國忠獻公安陽韓琦稚圭撰

文潞公集四十卷補遺一卷

丞相介休文彥博寬夫撰

富文忠集二十七卷

丞相韓國文忠公河南富弼彥國撰奉使錄亦在其末

武溪集二十卷

集賢院學士襄公曲江余靖安道撰

徂徠集二十卷

國子監直講魯國石介守道撰集中有南京夏尙書啟及夫子廟上梁文皆為夏竦作此介所謂大姦之去如距斯脫者

直齋書金角是 卷十七  
也豈當是時竦之姦猶未著耶陸子適刻於新定述其父放翁之言曰老蘇之文不能及然世自有公論也歐陽所以重介者非緣其文也

滄浪集十五卷

集賢校理蘇舜欽子美撰舜欽簡易之孫杜祁公衍之婿坐進奏院用公錢會客爲王拱辰輩所擠坐以深文廢逐而死置園蘇州爲滄浪亭水竹之勝冠於吳下至今猶存嘗答韓持國書具見其意趣本傳載之歐陽公序其文言子美之齒少於予而予學古文反在其後同時得罪者未幾復顯用舜欽獨先沒可哀也

宛陵集六十卷外集十卷

都官員外郎國子監直講宣城梅堯臣聖俞撰凡五十九卷爲詩他文賦纔一卷而已謝景初所集歐公爲之序外集者吳郡宋績臣所序謂皆前集所不載今考之首卷諸賦已載前集不可曉也聖俞爲詩古澹深遠有盛名於一時近世少有喜者或加毀訾惟陸務觀重之此可爲知者道也自世競宗江西已看不入眼况晚唐卑格方錮之時乎杜少陵猶有竊議妄論者其於宛陵何有

尹子漸集六卷

太常博士知懷州河南尹源子漸撰待制焯彥明其孫也

尹師魯集二十二卷

案文獻通攷作二十卷

直龍圖閣尹洙師魯撰源之弟也其父仲宣明經入仕父子

皆歐陽公誌其墓洙與穆伯長同爲古文范文正公爲作集序歐公亦稱其文簡而有法以剛直數忤時卒以貶死死時精明不亂有過人者

書判一卷

尹洙撰洙天聖二年進士後以安德軍節推試書判拔萃科中之前十道是程文餘當爲擬卷本朝惟余安道亦中是科集中有判詞二卷文鑑亦載一二又有王回判二道而回不以此科進餘未有聞

宋元憲集四十四卷

丞相鄭國元憲公安陵宋庠公序撰本名郊字伯庠天聖二年進士第一後有忌者譏之以姓符國號名應郊天仁宗命

改焉忌者之力止此後卒大用爲名臣

宋景文集一百卷

翰林學士景文公宋祁子京撰庠弟也自布衣名動場屋號二宋天聖二年同登第祁本首唱章獻謂弟不可以先兄以爲第十人而庠遂魁天下兄弟後皆貴顯景文清約莊重不逮其兄以此不至公輔所撰唐書列傳不稱良史景文筆記余於爲文似蘧瑗年五十知四十九年非余年六十始知五十九年非其庶幾至於道乎每見舊所作文章憎之必欲燒棄梅堯臣喜曰公之文進矣景文未第時爲學於永陽僧舍或問曰君好讀何書答曰余最好大誥故景文爲文謹嚴至修唐書其言艱其思苦蓋亦有所自歟

案景文筆記以下原本俱脫去今據文獻

通攷  
增入

六一居士集一百五十二卷附錄四卷年譜一卷

參政文忠公廬陵歐陽修永叔撰本朝初爲古文者柳開穆修其後有二尹二蘇兄弟歐公本以辭賦擅名場屋既得韓文刻意爲之雖皆在諸公後而獨出其上遂爲一代文宗其集徧行海內而無善本周益公解相印歸用諸本編校定爲此本且爲之年譜自居士集外集而下至於書簡集凡十各刊之家塾其子綸又以所得歐陽氏傳家本乃公之子棐叔弼所編次者屬益公舊客曾三異校正益完善無遺恨矣居士集歐公手所定也

李泰伯退居類藁十二卷續藁八卷常語二卷周禮致太平論

十卷後集六卷

太學說書南城李觀泰伯撰其自序曰天將壽我歟固爲未足也不然斯亦足以藉手見古人矣類藁慶厯所錄續藁皇祐所錄後集則門人傅野編泰伯不喜孟子常語專辨之嘗舉茂材不中世傳閣試論題有全不記所出者曰此必孟子注也擲筆而出

少微集三十卷

職方員外郎會稽齊唐祖之撰齊幹之後天聖八年進士兩應制科皆爲首選以切直報罷居鑑湖東北去城五里名其山曰少微其集顧臨爲之序

樂全先生集四十卷玉堂集二十卷

參政文定公南都張方平安道撰初舉茂材異等再舉賢良方正皆中其科識略過人知蘇洵父子於布衣惡王安石於攷試進士之日皆人所不能及也壽至八十五薨於元祐中於當時最爲著德然頗爲司馬溫公所不喜

胡文恭集七十卷

樞密副使文恭公晉陵胡宿武平撰晉陵之胡自文恭始大其猶子宗愈仍執政子孫爲侍從九卿者以十數紹興初世將承公亦其後也至今猶名族

臨川集一百卷

案文獻通攷作一百三十卷

丞相荆國文公臨川王安石介甫撰後改封舒王方嘉祐以前名重一世迹其文學論議操守使不至大位則光明俊偉

不可瑕玼矣老蘇曰使斯人而不用也則吾言爲過而斯人有不遇之歎孰知其禍之至此哉何其知之明也

王魏公集二十卷

案宋史本傳不言安禮封魏國此稱魏公未詳

尚書左丞王安禮和甫撰近時厚之順伯其曾孫也

王校理集六十卷

祕閣校理王安國平甫撰安國雖安石親弟而意向頗不合尤惡呂惠卿卒爲所陷坐鄭俠事奪官歸田里亦會惠卿方叛安石故也尋復之命下而卒

華陽集一百卷

丞相岐國文恭公龍舒王珪禹玉撰本成都人故稱華陽典內外制十八年集中多大典冊詔令其詩號至寶丹以其好

直齋書錄解題卷十七  
為富貴語也在相位無所建明人目為三旨於上前曰取聖旨曰領聖旨退謂吏則曰已得旨元豐末命珪本無異論亦緣其備首相不能早發大議依違遷延以召讒賊卒為本朝大禍需事之賊也豈不然哉珪一身追貶不足道也

傳家集一百卷

丞相溫國文正公涑水司馬光君實撰生於光州故名今光州有集本

丹淵集四十卷

集賢校理潼川文同與可撰東坡與之厚善墨君堂記篋管竹記皆為同作也司馬溫公稱其襟韻瀟灑如晴雲秋月塵埃不到則其為人可知矣其為湖州蓋未至而卒

蔡忠惠集三十六卷

案文獻通攷作十七卷

端明殿學士忠惠公莆田蔡襄君謨撰近世始刻於泉州王十朋龜齡為之序余嘗官莆至其居去城三里荔子號玉堂紅者正在其處矮屋欲壓頭猶是當時舊物歐公所撰墓誌石立堂下真蹟及諸公書帖多有存者京下同郡晚出欲自附於名聞自稱族弟本傳云爾襄孫佃唱名第一京時當國以族孫引嫌降第二佃終身恨之

元章簡玉堂集二十卷

參政章簡公錢塘元絳厚之撰絳之祖德昭相吳越本姓危氏臨川人唐末危全諷其伯父也德昭父曰仔倡聚眾保鄉里兵敗自臨川奔杭州易姓元至今建昌撫州邵武多危姓

絳能文辭晚歲以王介甫薦入翰林甚稱職遂柄用

呂正獻集二十卷

丞相東萊呂公著晦叔撰

劉狀元東歸集十卷

大理評事鉛山劉輝之道撰輝嘉祐四年進士第一人堯舜性仁賦至今人所傳誦始在場屋有聲文體奇澁歐公惡之下第及是在殿廬得其賦大喜既唱名乃輝也公爲之愕然蓋與前所試文如出二人手可謂速化矣仕止於郡幕年三十六以卒世傳輝旣黜於歐陽公怨憤造謗爲猥褻之詞今觀楊傑志輝墓稱其祖母死雖有諸叔援古誼以適孫解官承重服又嘗買田數百畝以賑其族而餉給之蓋篤厚之士

也肯以一試之淹而爲此儉薄之事哉

古靈集二十五卷

樞密直學士長樂陳襄述古撰襄在經筵薦司馬光而下三十三人皆顯於時紹興詔宣布之天下集序李忠定綱作也年譜載其世系出陳夷行之弟夷實自光州固始從王緒入閩家于福州攷之唐世系表有不合者嘗怪閩之士族推本家世輒言出自固始光在唐爲下州固始又其一縣當時不聞顯人安得衣冠望族如許就令有之王緒以壽春屠者爲盜王潮從之爲部曲轉鬪萬里而後入閩士大夫何緣隨逐不置蓋嘗思之王氏初建國人不自保護言鄉人幸其不殺後世子孫承襲其說世禩縣邈并與其初而忘之爾若陳氏

正齊書金角是 卷十一  
尤不應云然當永嘉之亂林黃陳鄭四姓先入閩林謂爲閩  
中記明著之矣尙得以一時脫死賊手之說守之而不變乎

鄖溪集五十卷

翰林學士安陸鄭獬毅夫撰皇祐五年進士首選坐知開封  
府不肯用案問新法爲王安石所惡而出廷試園丘象天賦  
時獬與滕甫俱有場屋聲甫賦首曰大禮必簡園丘自然自  
謂人莫能及獬但倒一字曰禮大必簡丘園自然甫聞之大  
服果居其次云

廣陵集二十卷

揚州布衣王令逢原撰令少年有盛名王介甫尤重之年二  
十八而卒其妻吳氏安石夫人之女弟也守志不嫁一女遺

孕嫁吳師禮其子曰說所謂吳傳朋也令之墓安石銘之案原  
本作令之墓誌安石名之據文後有劉發者爲之傳吳氏之  
獻通攷無誌字名作銘今改正墓其姪王雲銘之奉使死磁州者也

公是集七十五卷

侍讀學士新喻劉敞仲遷父撰號公是先生

彭城集六十卷

中書舍人劉敞叔贛父撰號公非先生敞兄弟俊敏博洽同  
登慶歷六年進士第敞本首冠以內兄王堯臣爲編排官引  
嫌遂得第二人仕早貴而不永年年財五十敞歷州縣二十  
年晚乃游館學元祐中始掌外制敞子奉世仲馮亦有名官  
至執政世稱三劉

老蘇嘉祐集十五卷

文安主簿編修禮書眉山蘇洵明允撰洵初入京師益帥張文定薦之歐陽公世皆知之而有雷簡夫者為雅守以書薦之張歐及韓魏公尤力張之知洵由簡夫世罕知之雷之書文亦慷慨偉麗可觀

東坡集四十卷後集二十卷內制集十卷外制集三卷奏議十

五卷和陶集四卷應詔集十卷

端明殿學士文忠公蘇軾子瞻撰一字仲和自謫黃州始號

東坡居士杭蜀本同但杭無應詔集

樂城集五十卷後集二十四卷第三集十卷應詔集十二卷

案應詔集文獻通攷作二十卷

門下侍郎文定公蘇轍子由撰一字同叔樂城真定府縣也

蘇氏望趙郡樂城元魏時屬趙郡故云晚居潁濱自號潁濱

遺老故集或名

三蘇年表三卷

右奉議郎孫汝聽撰汝聽當是蜀人敘蜀甚詳

東坡別集四十六卷

坡之曾孫給事嶠季真刊家集於建安大略與杭本同蓋杭本當坡公無恙時已行於世矣麻沙書坊又有大全集兼載志林雜說之類亦雜以潁濱及小坡之文且間有訛偽勦入者有張某為吉州取建安本所遺盡刊之而不加攷訂中載應詔策論蓋建安本亦無應詔集也

陳都官集三十卷

都官員外郎嘉禾陳舜俞令舉撰舜俞慶曆六年進士嘉祐四年制科以言新法謫官南康與劉凝之騎牛游廬山詩畫皆傳於世舜俞居湖秀境上初從安定胡先生學熙寧中六客其一也其墓在城南之蘇灣子孫猶宅於烏鎮

濂溪集七卷

廣東提刑營道周敦頤茂叔撰遺文纔數篇爲一卷餘皆附錄也本名敦實避英宗舊名改焉其仕以舅鄭向任晚年以疾求知南康軍因家廬山前有溪取營道故居濂溪名之二程所從學也又本并太極圖爲一卷遺事行狀附焉

明道集四卷遺文一卷

監察御史河南程顥伯淳撰三司使羽之後也其父曰珣顥之沒文潞公題其墓曰明道先生

伊川集九卷

案文獻通攷作二十卷

崇政殿說書程頤正叔撰

河南程氏文集十二卷

二程其爲一集建寧所刻本

元豐類藁五十卷續四十卷年譜一卷

中書舍人南豐曾鞏子固撰王震爲之序年譜朱熹所輯也案韓持國爲鞏神道碑稱類藁五十卷續四十卷外集十卷本傳同之及朱公爲譜時類藁之外但有別集六卷以爲散逸者五十卷而別集所存其什一也開禧乙丑建昌守趙汝

礪丞陳東得於其族孫維者校而刊之因碑傳之舊定著為四十卷然所謂外集者又不知何當則四十卷亦未必合其舊也

曲阜集四十卷奏議十二卷西垣集十二卷外制集三卷內制

集五卷

案文獻通攷西垣集作西掖集外制集三卷內制集五卷作五十卷

翰林學士文昭公會肇子開撰肇元祐中為西掖元符末再入故別名庚辰外制集肇制誥溫潤典雅其草兄布拜相制汪玉山稱之以為得命次相之體

王直講集十五卷

天台縣令南城王无咎補之撰无咎嘉祐二年進士曾鞏之妹夫從王安石游最久將用為國子學官未及而卒為之誌

墓曾鞏序其集云二十卷今惟十五卷

南陽集二十卷

門下侍郎穎昌韓維持國撰封南陽郡公故以名集沈晦元用其外孫也卷首載鮮于綽所述行狀而晦跋其後南澗元吉无咎其四世孫

無為集十五卷別集十卷

禮部郎濡須楊傑次公撰嘉祐四年進士元祐中為郎傑善談禪別集皆為釋老而釋又居十之九

清江三孔集四十卷

中書舍人新淦孔文仲經父禮部侍郎武仲常父戶部郎中平仲毅父撰寔先聖四十八世孫嘉祐六年八年治平二年

連三科兄弟以次登第文仲舉賢良對策切直忤時罷舉官  
 范鎮景仁因求致仕而制科亦自此廢武仲為禮部第一人  
 中甲科平仲亦嘗舉制科其著述各數十篇多散逸弗傳今  
 其存者文仲纔二卷武仲十七卷平仲二十一卷而已慶元  
 中濡須王邁少愚守臨江袁輯刊行而周益公必大為之序  
 序略曰遺文雖存一二於千百然讀之者知其為有德之言  
 非雕篆之習也昔黃太史頌當時人才有曰二蘇聯璧三孔  
 分鼎張丞相天覺在元符中詆元祐詞臣極其荒唐謂兩蘇  
 為狂率則剛直也謂公兄弟配之文行如何哉

今據文獻  
通攷增入

西溪集十卷

翰林學士錢塘沈邁文通撰初以郊社齋郎舉進士第一執  
 政謂己宦者不應先多士遂居其次實皇祐元年自是為故  
 事文通吏事精明強敏為杭州開封府皆有能名從容閒暇  
 夙興治事及午而畢卒時年四十餘其孫晦元用宣和中亦  
 魁天下

長興集四十一卷

翰林學士沈括存中撰括於文通為叔而年少於文通世傳  
 文通常稱括叔今四朝史本傳以為從弟者非也文通之父  
 扶扶之父同括之父曰周皆以進士起家官皆至太常少卿  
 王荆公志周與文通墓及文通弟遼誌其伯父振之墓可攷  
 括坐永樂事貶晚居京口自號夢溪翁自敘甚詳

雲巢集十卷

審官西院主簿沈遼叡達撰邁親弟也以兄任爲京官坐法流貶事見揮塵錄自永徙池築室齊山號雲巢竟不復起以上三集刊於括蒼號三沈集其次序如此蓋未之考也

蘇魏公集七十二卷

丞相魏國公溫陵蘇頌子容撰紳之子也紳在兩禁人稱其險詖而頌器局閎厚未嘗與人較短長其爲相在元祐末大臣奏事多稟宣仁獨頌必再以白哲廟其後免於遷謫蓋上以爲識君臣之禮故也年逾八十薨於建中靖國之初自草遺表卻醫屏藥死生之際了然集前後序汪藻周必大撰傅獻簡集七卷

中書侍郎獻簡公河陽傅堯俞欽之撰

赤城集十卷

兩浙提刑寧海羅適正之撰治平二年進士學於四明樓郁爲吏健敏頗爲蘇子瞻劉貢父諸公所知台士有聞於世自適始

西塘集二十卷

監安上門三山鄭俠介夫撰治平四年甲科小臣劄上言人所不敢言上爲之感動略施行其言不惟不怒而已旣而竟墮深譴良由呂惠卿欲傾王安石而俠與安國游從厚善遂起獄併陷之俠旣得罪新法遂不罷而本朝之禍本成矣小人勿用之戒可不畏哉安石親惠卿而疎俠豈惟誤國亦以

危身後之君子可以鑒矣

范忠宣集二十卷

丞相忠宣公吳郡范純仁堯夫撰文正公之次子也文正子四人長純佑允俊有賢行早年病廢以死富文忠誌其墓近時禮部尚書之柔者其四世孫也次純禮純粹皆顯用至大官

劉忠肅集四十卷

丞相忠肅公東光劉摯莘老撰凡四舉於鄉試禮部為第一登嘉祐四年甲科劉元城為集序述其出處大槩

畫墁集一百卷

吏部侍郎邠國張舜民芸叟撰舜民初用於元祐至元符末

為諫議大夫居職七日所上事六十章崇寧初坐謝表言紹聖逐臣有曰脫禁錮者何止一千人計水陸者不啻一萬里又曰古先未之或聞畢竟不知其罪以為譏謗坐貶自號浮休居士

淇水集八十卷

門下侍郎大名李清臣邦直撰清臣韓魏公姪壻案原本無姪字攷宋史本傳韓琦以兄女妻之蓋姪壻也今補正治平二年中制科歐陽公愛其文以比蘇軾其為人亦寬博有度而趨時嗜權利首主紹述之論意規宰相亦卒不如其志

范太史集五十五卷

翰林學士成都范祖禹淳甫撰

灌園集三十卷

鄉貢進士呂南公次儒撰熙寧初試禮部不利會以新經取士遂罷舉欲脩三國志題其齋曰袞斧書將成而死其書亦不傳元祐初諸公欲薦進之不及

伐檀集二卷

案文獻通攷作一卷

知康州豫章黃庶亞夫撰自為序庭堅其子也世所傳山魃水怪著薜荔之詩集中多此體庭堅詩律蓋有自來也庶慶曆二年進士

豫章集五十卷

案文獻通攷作三十卷

外集十四卷

著作郎黃庭堅魯直撰自號山谷道人

豫章別集二十卷

案文獻通攷作一卷

皆集中所遺者如承天塔記黃給事行狀毀壁其顯顯者也

諸孫管子耕集而傳之

宛邱集七十卷年譜一卷

起居舍人譙國張耒文潛撰宛邱陳州其所居也蜀本七十

五卷

后山集十四卷外集六卷談叢六卷理究一卷詩話一卷長短

句二卷

祕書省正字彭城陳師道無己撰一字履常蜀本但有詩文

合二十卷案魏衍作集序云離詩為六卷類文為十四卷今

蜀本正如此又言受其所遺甲乙丙藁詩曰五七文曰千百

今四明本如此此本劉孝睦刊於臨川云未見魏全本仍其

舊十四卷爲正集蓋不知其所謂十四卷者止於文而詩不與也外集詩二百餘篇文三篇皆正集所無談叢詩話或謂非后山作后山者其自號也

淮海集四十卷後集六卷長短句三卷

祕書省正字高郵秦觀少游撰一字太虛觀才極俊嘗應制舉不得召終以疎蕩不檢見薄於世後亦不免貶死

雞肋集七十卷

吏部員外郎鉅野晁補之无咎撰

濟南集二十卷

鄉貢進士華山李廌方叔撰又號月巖集東坡知貢舉得試卷以爲廌也置之首選已而不然賦詩自咎有平生漫說古

戰場過眼方迷日五色之句後竟不第

豫章集四十四卷宛邱集七十五卷后山集二十卷淮海集四十六卷濟北集七十卷濟南集二十卷

蜀刊本號蘇門六君子集

何博士備論四卷

武學博士浦城何去非正通撰去非以累舉對策稱旨授左班殿直教授武學後以東坡薦授承奉郎司農寺丞通判廬州別有文集二十卷未見

呻吟集一卷

原武邢居實敦夫撰恕之長子幼有俊才名聲藉甚一時前輩皆愛之年十九而卒宣仁之誣謗恕爲之也居實未死或

能當不義而爭萬一有補於世道是以諸賢尤痛惜焉晁以道追爲其墓表尤反覆致意

姑溪集五十卷後集二十卷

朝請大夫趙郡李之儀端叔撰嘗從東坡辟中山幕府後代范忠宣作遺表爲世傳誦然坐是得罪編置當塗遂居焉其弟之純官至尙書

大名集四十卷

簽書樞密魏郡王巖叟彥霖撰韓魏公客也

錢塘韋先生集十八卷

主客郎中錢塘韋驥子駿撰驥皇祐五年進士元祐中以近臣薦爲監司數路知明州以左朝議大夫致仕崇寧中乃卒

少以辭賦有聲場屋王荆公喜其借箸賦頗稱道之陳師錫誌其墓

強祠部集四十卷

三司戶部判官餘杭強至幾聖撰亦韓魏公客也在幕府表章書記多出其手曾南豐作集序稱其文備古今體兼人所長云

節孝集二十卷

楚州教授山陽徐積仲車撰治平四年進士以耳聾不能仕事其母極孝行義純篤古所謂卓行也東坡謂其詩文怪而放如玉川子

案東坡句原本節去今據文獻通考增入政和中賜諡節孝處士

樂靜集三十卷

樂靜集三十卷

卷二十一

三

起居舍人鉅野李昭玘成季撰案成季原本作成孝文獻通

傳改元豐二年甲科所居有樂靜堂故以名集其姪邠漢老

為書其後

學易集二十卷

朝奉郎東平劉跂斯立撰忠肅公摯之長子也與其弟蹈同

登元豐二年進士第元祐初以其父在言路政府不得用紹

聖以後復坐黨家連蹇終其身晁景迂誌其墓比孫明復石

守道之徒為文無所不長宣防宮賦學易堂記世傳誦之

田承君集三卷

太宗正丞陽翟田晝承君撰案晝原本作晝誤今晝樞密況

之姪也與鄒道鄉善鄒之貶晝曰願毋以此舉自滿士所當

為者未止此也

道鄉集四十卷

吏部侍郎晉陵鄒浩志完撰浩既諫立劉后坐貶徽宗初召

還對上首及之獎歎再三問諫草安在曰焚之矣分告陳瓘

瓘曰禍其始此乎異時姦臣安出一緘則不可辨矣蔡京素

忌之使其黨作偽疏言劉后殺卓氏而奪其子遂得罪其在

昭州作青詞告上帝有追省當時奏御之三章初無殺母取

子之一字云

婆娑集三十卷

右正言陽翟崔鷗德符撰鷗坐元符上書邪等廢於家治圃

號婆娑靖康初召為諫官力論馮澥之罪案澥原本作澥誤

正忽得孿疾不能行而卒無子其壻衛昂哀輯其遺文

潘水集四十卷

集英殿修撰長安李復履中撰元豐三年進士案文獻通攷作二年博

學有氣節其為熙河漕有旨造戰艦戰車復奏斥議者之謬

妄以為兒戲遂罷其役時論韙之

馬子才集八卷

鎮南節度推官鄱陽馬存子才撰元祐三年進士第四人

崇福集三十五卷四六集十五卷

朝請郎晁詠之之道撰景迂弟也為作集序詠之初以蔭為

揚州法曹未上時東坡守揚族兄无咎為倅以其文呈東坡

及至揚案此句原本云坡方守詠之具參軍禮趨謁坡走下揚今據文獻通攷改正

庭攜手以上謂坐客曰此奇才也紹聖元年登第繼中詞科

坐元符卯等罷廢後奉崇福祠故以名集

陶山集二十卷

尚書左丞山陰陸佃農師撰

東堂集六卷詩四卷書簡二卷樂府二卷

祠部郎江山毛滂澤民撰滂為杭州法曹以樂府詞有佳句

受知於東坡遂有名嘗知武康縣縣有東堂集所以名也又

嘗知秀州修月波樓為之記其詩文視樂府頗不逮

溪堂集二十卷

臨川謝逸無逸撰

竹友集十卷

臨川謝邁幼槃撰逸從弟也呂居仁題其後曰逸詩似康樂

邁詩似元暉

了齋集四十二卷

案文獻通考作三十卷

司諫延平陳瓘瑩中撰江應辰為集序以為出死力攻權姦

者天下一人而已矣非虛語也

約論十七卷

陳瓘撰起戰國至後漢安帝蓋讀通鑑隨事有所發明者也

浮沚先生集十六卷後集三卷

祕書省正字永嘉周行己恭叔撰十七入太學有盛名師事

程伊川元祐六年進士為博士太學以親老歸教授其鄉再

入為館職復出作縣永嘉學問所從出也鄉人至今稱周博

士集序林越撰言為祕書郎則不然先祖妣先生之第三女

先君子其自出也故知其本末所居謝池坊有浮沚書院

斜川集十卷

通直郎蘇過叔黨撰世號少坡坐黨家不得仕進終於通判

中山府晁以道誌墓稱其純孝給事中嶠其孫也

九峰集四十卷

太常少卿眉山蘇元老在廷撰東坡從孫也坡在海上嘗有

書往來其罷奉常歸頴昌正坐元祐邪說未幾遂卒年四十

七

清直集二十四卷

徽猷閣待制錢塘周邦彥美成撰元豐七年進汴都賦自諸

直齋書金角是 卷十一  
生命爲太學正邦彥博文多能尤長於長短句自度曲其提  
舉大晟府亦由此既盛行於世而他文未傳嘉泰中四明樓  
鑰始爲之序而太守陳杞刊之蓋其子孫家居於明故也汴  
都賦已載文鑑世傳賦初奏御詔李清臣讀之多古文奇字  
清臣誦之如素所習熟者乃以偏傍取之爾鑰爲音釋附之  
卷末

清真雜著三卷

邦彥嘗爲溧水令故邑有詞集其後有好事者取其在邑所  
作文記詩歌併刻之

寶晉集十四卷

禮部員外郎襄陽米芾元章撰其母閻氏與宣仁后在藩時

有舊故以后恩補試銜入仕其上世皆武官蓋國初勳臣米  
信之後也視芾爲五世孫酷嗜古法書家藏二王真蹟故號  
寶晉齋蓋由得謝東山二王各一帖遂刊置無爲而名齋云

玉池集十二卷

考功郎湘陰鄧忠臣慎思撰熙寧三年進士坐元符黨廢不  
用言者論其議范忠宣諡過實又坐罰銅崇觀間卒平生著  
述至多嘗和杜詩全帙又嘗獻郊祀慶成賦及原廟詩百韻  
裕陵喜之擢爲館職今皆軼弗傳所存一二而已玉池其所  
居山峯名

橘林集十六卷後集十五卷

密州教授石忞敏若撰崇寧壬午以同進士出身中詞科其

文雕琢怪奇殊乏蘊藉壓卷策問言王金陵配饗先聖事謂其以百聖芻豢甘四海口以六經河漢洗四海心以九達夷路破四海迷以萬金良藥起四海病讀之不覺大笑其人與文皆不足道也集僅二冊而卷數如此麻沙坊本往往皆然龍雲集三十二卷附錄一卷

著作佐郎廬陵劉弇偉明撰元豐進士紹聖詞科曾慥詩選

唐子西集二十卷

案文獻通攷作十卷

以此石敏若非其倫也龍雲安福縣鄉名弇所居也

宗學博士眉山唐庚子西撰張商英拜相庚作內前行後坐貶惠州歸蜀而卒其文長於論議所著名治存舊正友議賞諸論皆精確

東觀餘論一卷

案文獻通攷作三卷

祕書郎昭武黃伯思長睿撰伯思右丞黃履之孫吳園張根之婿於李忠定綱為中外襟袂故忠定誌其墓伯思元符庚辰進士年四十而卒好古博雅喜神仙家言自號雲林子別字霄賓有集一百卷此書止法帖刊誤及序跋古書畫器物故名餘論

北湖集十卷長短句一卷

直祕閣知虢州富川吳則禮子則撰其父中復以孫抃薦為御史不求識面臺官者也中復弟幾復嗣復子立禮及嗣復子審禮皆登科有名譽則禮以父澤入仕晚居豫章自號北湖居士

劉左史集四卷

起居郎永嘉劉安節元承撰與從弟安上皆嘗事二程同游太學號二劉安節元符三年進士為察官左史晚知宣州以沒

箕穎集二十卷

穎昌曹組元寵撰組本與兄緯有聲太學亦能詩文而以滑稽下俚之詞行於世得名良可惜也謝克家任伯為集序其子助跋其後略見其出處蓋宣和三年始登第郊禮進祥光賦有旨換武階兼閣職詔中書召試仍給事殿中未幾而卒然集中有謝及第啟自序云蚤預諸生竟叨右列則未第之前已在西班未知何以也曾慥詩選云六舉不第宣和中詔

赴廷試賜第啟中所謂特舉辱微許從俊造慥之言良是序跋不著其實爾

梅文安集十五卷

戶部尚書浦江梅執禮和勝撰執禮死於靖康之禍人因哀其不幸而不知吳革趙子昉之謀執禮實主之事既泄范瓊殺革徐秉哲以子昉遺金金知執禮預謀以根括金銀為罪問誰為長官意在執禮也安扶恐其坐之進曰皆長官也遂俱死文安者所封開國縣也

李忠愍集十二卷

吏部侍郎臨洺李若水清卿撰後二卷為附錄其死事時財三十五歲本名若冰以靖康出使改今名詩文雖不多而詩

直齋書金角是 卷一  
有風度文有氣槩足以知其所存矣

夷白堂小集二十卷別集三卷

考功員外郎括蒼鮑慎由欽止撰元祐初以任子試吏部銓第一復登六年進士乙科甫脫選卽爲郎然自是數坐累官竟不進其父粹始居吳故葬於吳興

清溪集十卷附錄一卷

案文獻通攷清作青

楚州教授臨川汪革信民撰紹聖四年試禮部第一遂登甲科蔡京當國召爲宗子博士力辭不就年財四十卒呂原明誌其墓晁以道爲辭以哀之革嘗有言曰咬得菜根則萬事可做誠名言也

玉溪集二十一卷

左司員外郎永嘉倪濤巨濟撰其父始徙居廣德濤大觀三年進士燕山之役誦言其非以沮軍罷謫衡州茶陵以死年三十九呂居仁誌其墓曾吉父爲作集序

竹隱畸士集四十卷

右文殿修撰韋城趙鼎臣承之撰元祐甲科紹聖宏詞又自號葦溪翁其孫剛立刊於復州本百二十卷刊止四十卷而代去遂止

傅忠肅集三卷

待制濟源傅察公晦撰堯俞從孫也宣和七年以吏部郎接伴金使金人入寇使人不來爲敵驅去幹里布脅使拜不屈見殺

直齋書錄解題卷十七  
丁永州集三卷

知永州吳興丁注葆光撰元豐中余中榜進士喜爲歌詞世所傳催雪無悶及重午慶清朝皆有承平閒雅氣象有女適樂清令富春李素見素實先妣之大父母也

石門文字禪二十卷

僧高安喻德洪覺範撰一作惠洪其在釋門得法於真淨克文而於士大夫則與黨人皆厚善誦習其文得罪不悔爲張商英陳瓘鄒浩尤盡力其文俊偉不類浮屠語韓駒子蒼爲塔銘云爾

直齋書錄解題卷十七

直齋書錄解題卷十八

宋陳振孫撰

別集類下

演山集六十卷

端明殿學士延平黃裳冕仲撰元豐二年進士第一人貴顯於崇觀死於建炎年八十有七方三舍法初行裳謂宜近不宜遠宜少不宜老宜富不宜貧不如遵祖宗科舉之制世傳以爲口實

景迂集二十卷

徽猷閣待制晁說之以道撰又本止刊前十卷說之平生著述至多兵火散逸其孫子健哀其遺文得十二卷續廣之爲

二十卷別本刊前十卷而止者不知何說也劉跂斯立墓誌景迂所撰見學易集後而此集無之計其逸者多矣說之元豐五年進士元祐初蘇文忠范太史曾文昭皆薦之坐元祐邪等廢棄靖康末始為從官卒於建炎三年慕司馬溫公為人自號景迂生

龜山集二十八卷

工部侍郎延平楊時中立撰時及從明道死當建炎四年年八十有七於程門最為壽考

梁谿集一百二十卷

丞相忠定公昭武李綱伯紀撰父夔進士起家至右文殿修撰黃右丞履之甥也綱娶吳園先生張根之女亦右丞外孫

梁谿名集者修撰葬錫山忠定嘗廬墓云

襄陵集二十四卷

尚書右丞襄陵許翰松老撰元祐三年進士靖康初入西府建炎為丞轄與黃潛善輩不合而去

後湖集十卷

丹陽蘇庠養直撰其父堅伯固亦有詩名庠以遺澤昇其子而自放江湖間東坡見其清江曲大愛之由是得名僧祖可正平號癩可者其弟也庠中子扶亦工詩有清苦之節庠紳之後頌之族

初寮集四十卷後集十卷內外制二十四卷

尚書左丞中山王安中履道撰安中年十四薦於鄉凡四舉

乃登第爲中司受旨攻蔡京京子攸入禁中日夕泣涕告于  
上安中亟改翰苑事遂止其自政府出守燕京父子排之也  
然安中之進亦本由梁師成始東坡帥定武安中未弱冠猶  
及師事焉未卒業而坡去其後晁以道爲無極令安中旣第  
修邑子禮用長牋自言以新學竊一第爲親榮非其志也以  
道曰爲學當謹初何患不遠到安中築室榜曰初寮其議論  
聞見多得于以道旣貴顯遂諱晁學但稱成州使君四丈無  
復先生之號矣甚哉籍湜不畔之難也

劉給事集五卷

給事中劉安上元禮撰紹聖四年登第歷臺諫掖垣瑣闥以  
次對歷三郡而終集中有彈蔡京疏

橫塘集三十卷

尙書右丞瑞安許景衡少伊撰亦嘗從程氏學建炎初爲執  
政與黃汪不合罷建議渡江幸建康言者以爲非是及下還  
京之詔景衡以憂卒於瓜洲未幾敵騎奄至淮揚倉卒南渡

章貢集二十卷

祕書監章貢李朴先之撰紹聖元年進士坐言隆祐之賢廢  
三十年蔡京欲強致之不屈靖康建炎之間半歲五遷而病  
不能行以死其教授西京國子監也程伊川與之甚厚然謂  
其太直以洛中風波爲戒朴笑曰不意此言發于先生之口  
伊川爲之改容愧謝其風節可畏也

歐陽修撰集六卷

崇仁布衣贈祕閣修撰歐陽澈德明撰澈死時年三十一環  
溪吳流哀其詩爲飄然集三卷而會稽胡衍晉遠取其所上  
三書併刻之臨川倅解

空青遺文十卷

直寶文閣南豐曾紆公卷撰紆布之子有異材建中靖國初  
布在相位奉詔爲景靈西宮碑紆之筆也建炎紹興之際將  
漕江浙入爲司農少卿知信衢州以卒汪彥章誌其墓孫仲  
益序其文王銍性之其壻也

石林總集一百卷年譜一卷

尙書左丞吳郡葉夢得少蘊撰紹聖四年進士崇觀間驟貴  
顯三十一歲掌外制次年遂入翰林中廢至建炎乃執政然

財數日而罷平生所歷州鎮皆有能聲胡文定安國嘗以其  
蔡潁南京之政薦于朝謂不當以宿累廢晚兩帥金陵當烏  
珠臨江移三山平羣寇其功不可沒也秦檜秉政欲令帥蜀  
辭不行忤檜意以崇慶節度使致仕其居在卞山奇石森列  
藏書數萬卷旣沒守者不謹屋與書俱燼于火石林二字本  
出楚辭天問

石林建康集十卷

皆帥建康時詩文其初以所莅官各爲一集後其家編次總  
而合之此集其一也

石林審是集八卷

其門人盛光祖子紹所錄亦已入總集

浮溪集六十卷

翰林學士婺源汪藻彥章撰四六偶儷之文起於齊梁歷隋唐之世表章詔誥多用之然令狐楚李商隱之流號爲能者殊不工也本朝楊劉諸名公猶未變唐體至歐蘇始以博學富文爲大篇長句敘事達意無艱難牽強之態而王荆公尤深厚爾雅儷語之工昔所未有紹聖後置詞科習者益衆格律精嚴一字不苟措若浮溪尤其集大成者也

翟忠惠集三十卷

參政丹陽翟汝文公巽撰汝文制誥古雅多用全句氣格渾厚近世罕及夫人邢氏恕之女居實其弟也長子者年寔刑出好古博文高尚不仕忠惠者私諡也

鴻慶集四十二卷

戶部尙書晉陵孫覲仲益撰大觀三年進士政和四年詞科代高麗謝賜燕樂表膾炙人口生元豐辛酉卒乾道己丑葢年八十有九可謂耆宿矣而其平生出處至不足道也嘗提舉鴻慶宮故以名集

呂忠穆集十五卷

丞相濟南呂頤浩元直撰後三卷爲燕魏錄雜記古今事卷末言金人敗盟始末甚詳

忠正德文集十卷

丞相聞喜趙鼎元鎮撰四字高廟所賜宸翰中語也

北山小集四十卷

中書舍人信安程俱致道撰俱父祖世科而俱乃以外祖鄧潤甫蔭入仕宣和中賜上舍出身為南宮舍人紹興初入西掖徐俯為諫議大夫封還詞頭罷去後以次對修史病不能赴而卒

陵陽集五十卷

中書舍人仙井韓駒子蒼撰自幼能詩黃太史稱其超軼絕塵蘇文定以比儲光義游太學不第政和初獻書召試賜出身後入西掖坐蘇氏鄉黨曲學罷

丹陽集四十二卷後集四十二卷

顯謨閣待制江陰葛勝仲魯卿撰紹聖四年進士元符三年詞科洪慶善序其文有所謂絕郭天信案郭天信見宋史方技傳原本作大信誤

今改拒朱勔慙盛章而怒李彥者蓋其平生出處之略也再知湖州後遂家焉

尹和靖集一卷附集一卷

徽猷閣待制河南尹焞彥明撰子漸之孫年十九舉進士策問欲誅元祐黨籍不對而出遂罷舉靖康賜號和靖處士敵陷洛陽闔門遇害死而復蘇門人潛載以逃客涪州以范元長薦入經筵擢列侍從葬會稽山

綦北海集六十卷

翰林學士北海綦密禮叔厚撰工於四六秦檜初罷相密禮當制有御筆詞頭藏其家檜再相下台州追索時密禮已死幸不及禍

雲龕草堂後集二十六卷

參政鉅野李邴漢老撰明受之變以兵部侍郎直學士院叱責寇渠朝廷賴焉既復辟首擢執政周益公作神道碑言前後集一百卷今惟後集蓋皆南渡後所作也朱文公為之序漢老樂靜右史之姪五世祖濤五代時宰相石晉之亂弟澣在翰林陷于敵及邴立節于建炎而其弟鄴守會稽亦隨金人北去世以為異

龜谿集十二卷

知樞密院忠敏吳興沈與求必先撰建炎紹興之間歷三院翰苑以至執政嘗奏言王安石之罪大者在于取楊雄馮道當時學者惟知有安石喪亂之際甘心從偽無仗節死義之

風實安石倡之此論前未之及也紹興七年終于位

胡忠獻集六十卷

案文獻通攷題胡承公集十卷資古紹志集十卷

端明殿學士晉陵胡世將承公撰文恭公宿之曾孫以兵部侍郎為川陝副宣金人敗盟繼吳玠之後經畫守禦以迄和議再成分疆未定死于河池世將好古博雅有資古紹志錄做集古錄跋尾亦見集中諡忠獻案諡忠獻句原本脫去今據文獻通攷增入

胡文定公武夷集十五卷

給事中崇安胡安國康侯撰紹聖四年進士第三人仕四十年實歷不及三載著春秋傳行于世本喜為文後篤志于學乃不復作其辭召試曰少習藝文不稱語妙晚捐華藻纔取理明既覺昨非更無餘習故其文集止此

毗陵集五十卷

參政文靖毗陵張守全真撰一字子固

案子固原本作子同誤今據宋史本傳改

正崇寧進士詞科紹興執政張魏公在相位薦秦檜再用守

有力焉一日與魏公言某誤公聽今朝夕同班列得款曲其

人似以曩者一跌為戒有患失心宜自劾謝上魏公為作墓

志著其語

張章簡華陽集四十卷

參政金壇張綱彥正撰大觀中舍法三中首選釋褐為承事

即辟雍正蓋專于新學者紹興初在瑣闥忤張俊求去復與

秦隙遂引年秦亡乃召用乾道初年八十四而終自號華陽

老人華陽者茅山也

非有齋類藁五十卷

給事中吳興劉一止行簡撰宣和三年進士居瑣闥僅百餘

日忤秦檜罷去閒居十餘年以次對致仕檜死被召力辭進

雜學士而終年八十二實紹興庚辰

竹西集十卷西垣集五卷

兵部侍郎維揚王居正剛中撰宣和三年進士紹興初入詞

掖西垣集者制草及繳章也其篇目凡繳章皆云封還詞頭

蓋其子孫編次者之失也除授則有詞頭政刑庶事何詞頭

之有

張巨山集三十卷

中書舍人光化張嶠巨山撰嶠為司勳郎官金人再取河南

直齋書錄解題卷十一  
秦相惶恐上章引伊尹善無常主及周任不能者止之文以  
白解噪之筆也秦德之遂擢修法掌制而其具藁倉卒誤以  
伊尹告太甲為告湯及周任之言為孔子自言時祕書省寓  
傳法寺有書其門曰周任為孔聖太甲作成湯秦疑諸館職  
為之多被逐然噪亦以答檜三折肱之語謂其貳于已無幾  
亦罷

默成居士集十五卷

中書舍人潘良貴子賤撰一字義榮剛介之士也朱侍講序  
其集略見其出處大致

默堂集二十二卷

案文獻通攷作二十卷

宗正少卿延平陳淵知默撰一字幾叟了翁之姪孫楊龜山

門人紹興初嘗為諫官

筠谿集二十四卷

戶部侍郎連江李彌遜似之撰

案遜原本作聖文獻通攷作遠俱誤今據宋史改正

大觀三年上舍第一知冀州能抗金敵攝江東帥與李忠定平

周德之亂晚為從官沮和議坐廢而終

鄱陽集十卷

徽猷閣直學士鄱陽洪皓光弼撰皓奉使金國守節不屈既  
歸為秦所忌謫英州死之日與秦適相先後三子登詞科俱

貴顯

東窗集四十卷

中書舍人鄱陽張廣彥實撰與呂居仁為詩友其在西掖當

紹興十一年

雪谿集略八卷

汝陰王銍性之撰國初周易博士昭素之後也其父萃樂道嘗從歐公學銍爲曾紆壻嘗撰七朝國史紹興初嘗同子正薦之詔視秩史官給札奏御會秦氏柄國中止書竟不傳其子明清著揮塵錄

致堂斐然集三十卷

禮部侍郎胡寅明仲撰文定公長子也本其兄子初生棄不舉文定于水盆內收育之既長俾自絕于本生不爲心喪止服世父之服寅遵行之集中有與秦丞相書言之甚詳人倫之變古今所未有也寅宣和初進士紹興初已爲從官不主

五峰集五卷

和議秦本與其父子有契分竟謫新州檜死北歸沒於岳州右承務郎胡宏仁仲撰文定季子不出仕篤意理學南軒張栻其門人也別本不分卷

竹軒雜著十五卷

太常少卿永嘉林季仲懿成撰以趙元鎮薦入朝奏疏沮和議得罪仲熊叔豹季狸其弟也皆知名

北山集三十卷

端明殿學士金華鄭剛中亨仲撰紹興二年進士亞魁受知秦相擢使川陝後忤意貶死封州

澹庵集七十八卷

端明殿學士忠簡廬陵胡銓邦衡撰建炎甲科第五人既上書乞斬秦檜謫嶺海秦死得歸孝宗即位始復官召用又以沮再和之議得罪去乾道中大為丞郎亦不容于時奉祠至淳熙七年乃終年七十有九

相山集二十六卷

朝奉大夫濡須王之道彥猷撰宣和六年兄弟三人同登科建炎寇亂率族保明避山從之者皆得免以功改京官沮和議得罪晚乃歷磨節其子藺被遇阜陵貴顯

韋齋小集十二卷

吏部員外郎新安朱松喬年撰侍講文公之父也文公嘗言韋齋先生自為兒童時出語已驚人及去場屋始致意為詩

文其詩初亦不事彫飾而天然秀發格律閒暇超然有出塵

寰之趣

案文公嘗言以下原本脫去今據文獻通攷增入

關博士集二十卷

太學博士錢塘關注子東撰紹興五年進士嘗為湖州教授

自號香巖居士

石月老人集三十五卷

朝議大夫致仕鄱陽余安行勉仲撰安行累舉不第其子應求以童子登崇甯五年進士科為御史歷磨節所至迎養其父至九十六乃終著書號至言蓋純篤之士也

王著作集四卷

著作佐郎福清王蘋信伯撰從程門學以趙忠簡薦召對賜

正齊書金角是 卷十八  
出身秦檜惡之會其族子坐法牽連文致奪官以死

屏山集二十卷

通判興化軍崇安劉子翬彥冲撰父韜兄子羽子翬以蔭入仕年甫四十八而卒宋文公其門人也嘗謂朱曰吾少聞佛老之說歸讀吾書然後知吾道之大體用之全如此於易得入德之門焉作復齋銘聖傳論可以見吾志矣

東溪集十二卷

案文獻通攷作二十卷

迪功郎漳浦高登彥先撰考試潮州策問忤秦相謫死

緡經堂集八卷

知盱眙軍東平畢良史少董撰文簡公士安五世孫嘗陷敵有從之游者因爲圖名緡經寫其訪問紬繹之狀

藥寮叢藁二十卷

太常少卿上蔡謝伋景思撰參政克家之子

巖壑老人詩文一卷

左朝請大夫洛陽朱敦儒希真撰初以遺逸召用嘗爲館職既挂冠秦檜之孫壘欲學爲詩起希真爲鴻臚少卿將使教之懼禍不敢辭不久秦亡物論少之合有全集未見

鶴溪集十二卷

辟雍博士青田陳汝錫師子撰紹聖四年進士持節數路帥越而卒青田登科人自汝錫始希點子與其孫也

岳武穆集十卷

樞密副使鄴郡岳飛鵬舉撰飛功業偉矣不必以集著也世

所傳誦其賀和議成一表當亦是模客所為而意則出于岳也

漢濱集六十卷

參政襄陽王之望瞻叔撰周益公為集序

玉山翰林詞草五卷

尚書玉山汪應辰聖錫撰紹興五年進士首選本名洋御筆改賜天材甚高而不喜為文謂不宜弊精神於無用然每作輒過人以天官兼翰苑近二年所撰制詔溫雅典實得玉言體朱晦翁稱為近世第一

太倉稊米集七十卷

樞密編修宣城周紫芝少隱撰自號竹坡居士

白蘋集四卷

右文林郎單父龐謙儒祐甫撰莊敏公籍之曾孫用季父恩仕不遂而死韓南澗志其墓嘗客居吳興故集名白蘋

南澗甲乙藁七十卷

吏部尚書潁川韓元吉无咎撰門下侍郎維之元孫與其從

兄元龍子雲皆嘗試詞科不利居廣信溪南案廣信原本作廣德誤今據文

獻通攷號南澗

艇齋雜著一卷

南豐曾季狸表父撰鞏之弟曰湘潭主簿宰宰之孫曰大理司直晦之季狸其子也少從呂居仁徐師川遊嘗一試禮部不中乾淳間名公多敬畏之具見其子濼所集師友尺牘此

編蓋其議論古今之文辭質而義正可以得其人之大略

溪園集十卷

靳春吳億大年撰其父擇仁爲尚書億仕至靜江倅居餘干有溪園佳勝世傳其樓雪初納詞爲建康帥晁謙之作

于湖集四十卷

中書舍人歷陽張孝祥安國撰甲戌冠多士出思陵親擢秦相孫壘遂居其下秦忌惡之以他事下其父子大理獄明年秦亡上旣素眷不五年登法從阜陵尤眷之不幸不得年死時財四十餘上嘗有用不盡之歎其文翰皆超逸天才也

南軒集三十卷

侍講廣漢張栻敬夫撰魏忠獻公浚之長子當孝宗朝以任

于不賜第入西掖者韓元吉劉孝韙其入經筵則栻也

王司業集二十卷

案文獻通攷作三十卷

國子司業宛邱王逯致君撰建炎初其家避亂沿汴南下逯年十一偶小泊登岸敵適至亟解維不暇顧遂失之在金十年間關得歸其父工部尚書俟也旣歸入太學登癸未科爲諫官御史歷麾節終于少司成

浮山集十六卷

左朝請大夫江都仲并彌性撰紹興壬子進士晚丞光祿寺得知蘄州并嘗倅湖籍中有所盼爲作生朝青詞好事者傳誦之遂漏露坐謫官其訓詞略曰爾爲瀆侮之詞曾弗知畏天其知畏吾法乎吾鄉前輩能道其事如此

直齋書錄解題卷十八  
小醜集十二卷續集三卷

直祕閣眉山任盡言元受撰元符諫官伯雨之孫紹興從臣  
申先之子乙卯甲科仕爲太常寺主簿終于閩憲

拙齋集二十之卷

校書郎候官林之奇少穎撰之奇學于呂本中而太史祖謙  
學于之奇其登第當紹興辛未年已四十未幾卽入館方鄉  
用而得末疾

霜傑集三十卷

德興董穎仲達撰紹興初人從汪彥章徐師川游彥章爲作  
序

妙筆集四十卷

案文獻通攷  
妙筆作妙峯

中書舍人福清林通述中撰元符三年甲科苗劉之變在西  
掖不失節思陵嘉之終龍圖直學士

鄮峰眞隱漫錄五十卷

丞相文惠公四明史浩直翁撰

論癡符二十卷

御史臨海李庚子長撰論之義術驚也市人鬻物於市誇號  
之曰論原註此三字本出顏氏家訓以譏無才思而流布醜  
拙者以名其集示謙也庚乙丑進士以湯鵬舉薦辟入臺家  
藏書甚富

梯雲集二十五卷

中書舍人資川趙達莊叔撰辛未大魁有氣節四十一歲卒

海陵集三十二卷

同知樞密院海陵周麟之茂振撰乙丑進士戊辰詞科既執政被命使金亮辭行得罪去

胡獻簡詞垣草四卷

禮部尙書會稽胡沂周伯撰

介庵集十卷

左司郎官趙彥端德莊撰乾道間名士也嘗宰餘干趙忠定其邑人初冠多士德莊在朝往謁謝德莊語之曰謹勿以一魁先置胸中可謂名言

石湖集一百三十六卷

參政吳郡范成大致能撰初以起居郎使金附奏受書事抗

金主於其殿陛間歸而益被上眷以至柄用石湖在太湖之濱姑蘇臺之下去城十餘里面湖爲堂號鏡天閣又一堂扁石湖二字阜陵宸翰也今日就荒毀更數年恐無復遺跡矣頃一再過之爲之慨然

周益公集二百卷年譜一卷附錄一卷

丞相益文忠公廬陵周必大子充撰一字宏道其家既刊六一集故此集編次一切視其凡目其間有奉詔錄親征錄龍飛錄思陵錄凡十一卷以其多及時事託言未刊人莫之見鄭子敬守吉募工人印得之余在莆田借錄爲全書然猶漫其數十處益公自號平園叟

渭南集三十卷

案文獻通攷作二十卷

劍南詩藁續藁八十七卷

華文閣待制山陰陸游務觀撰左丞佃之孫紹興末召對賜  
出身隆興初為樞密院編修官鄉用矣坐漏泄省中語阜陵  
以為反復斥遠之後以夔倅入蜀益自放肆不護細行自號  
放翁在蜀九年乃歸晚由嚴陵召為南宮舍人將內禪益公  
薦直北門上終不用及韓氏用事游既挂冠久矣有幼子澤  
不逮為侂胄作南園記起為大達以次對再致仕嘉定庚午  
年八十六而終游才甚高幼為曾吉父所賞識詩為中興之  
冠他文亦佳而詩最富至萬餘篇古今未有故文與詩別行  
渭南者封渭南縣伯

復齋制表二卷

刑部侍郎王稚嘉叟撰初寮安中之孫紹興乾道間名士也

陸放翁與之厚善

盤洲集八十卷

丞相文惠公鄱陽洪适景伯撰忠宣之長子方奉使時文惠  
甫十三歲後與其弟遵同中壬戌宏博科本名造後改焉又  
三年乙丑弟邁繼之世號三洪其自淮東總領入為太常少  
卿一年而入右府又半年而拜相然在位僅三閱月為林安  
宅所攻而去嘗一帥越閒居十六年而終

小隱集七十卷

樞密文安公洪遵景嚴撰其進用最先于兄弟而得年不永

薨於淳熙元年

野處類藁一卷

案文獻通攷作二卷

翰林學士文敏公洪邁景廬撰其全集未見

誠齋集一百三十三卷

寶謨閣學士文節公廬陵楊萬里廷秀撰當淳熙末為大蓬  
論思陵配饗不合去及韓侂胄用事召之卒不至自次對遷  
至學士聞開禧出師不食而死自作江湖集序曰予少作有  
詩千餘篇至紹興壬午皆焚之大概江西體也今所存曰江  
湖集者蓋學后山及半山及唐人者也

案自作江湖集序以下一段原本脫去今據文獻通考增入

程文簡集二十卷

吏部尚書新安程大昌泰之撰每卷分上下其實四十卷也  
博學長於攷究著述甚多皆傳于世

樵隱集十五卷

信安毛扞平仲撰禮部尚書友之子負才傲世仕止州倅與  
尤遂初厚善臨終以書別之囑以志墓延之既為銘又序其  
集

梁谿集五十卷

禮部尚書錫山尤袤延之撰家有遂初堂藏書為近世冠

鄭景望集三十卷

宗正少卿永嘉鄭伯熊景望撰

歸愚翁集二十六卷

秀州判官鄭伯英景元撰近世永嘉學者推二鄭伯熊紹興  
乙丑進士自隆興初為館職王府東宮官至少司成宗正

正齋書金角是 卷十一  
用矣每小不合輒乞去卒於建寧守伯英癸未甲科第四人  
以親養三十年不調竟不出二人皆豪傑之士也

晦庵集一百卷紫陽年譜三卷

待制侍講文公新安朱熹元晦撰年譜昭武李方子公晦所  
述其門人也

習庵集十二卷

戶部侍郎曾逮仲躬撰文清公幾之子

東萊呂太史集十五卷別集十六卷外集五卷附錄三卷

著作郎東萊呂祖謙伯恭撰其弟祖儉編錄凡家範尺牘之  
類總之別集策問宏詞程文之類總之外集年譜遺事則見  
附錄太史曾文清外孫隆興癸未鎖廳甲科宏詞亦入等行

未達得末疾奉祠年財四十五卒于淳熙辛丑平生著述皆  
略舉端緒未有成書者學者惜之

大愚叟集十一卷

太府寺丞呂祖儉子約撰祖謙弟也慶元初上封事論救祭  
酒李祥謫高安以沒寓居大愚寺故以名集

千巖擇藁七卷外編三卷續編四卷

知峽州三山蕭德藻東夫撰嘗宰烏程後遂家焉楊誠齋序  
其集曰近世詩人若范石湖之清新尤梁谿之平淡陸放翁  
之敷腴蕭千巖之工緻皆余所畏也

濟溪老人遺藁一卷

通判明州濟源李迎彥將撰永嘉周浮沚先生之壻與先大

父爲襟袂集中有送先君子赴戊子秋試詩首句籍甚人言  
易已東蓋先君治易故也集序周益公作

訢庵集四十卷

案文獻通攷  
訢庵作沂庵

新津任淵子淵撰紹興乙丑類試第一人仕至潼川憲嘗註

山谷后山詩行於世新津有天社山故稱天社任淵

方舟集五十卷後集二十卷

資陽李石知幾撰石有盛名於蜀少嘗客蘇符尚書家紹興  
末爲學官乾道中爲郎歷磨節皆以論罷趙丞相雄其鄉人  
也素不善石石以是晚益困其自敘云宋黜魯倉今猶古也

歸愚集二十卷

吏部侍郎葛立方常之撰勝仲之子丞相邨之父也以郎官

攝西掖忤秦相得罪更化召用言者又以爲附會沈該罷去  
遂不復起

綺川集十五卷

太常寺主簿歸安倪偁文舉撰紹興八年進士齊齋之父

象山集二十八卷外集四卷

知荆門軍金谿陸九淵子靜撰與其兄九齡子壽乾淳間名  
士也象山在貴溪結茅其上與士友講學山形如象故名

施正憲集六十七卷外集二卷

案外集文獻  
通攷作三卷

知樞密院廣信施師點聖與撰其在政府六年上眷未衰慨  
然勇退引去不可回識者壯其決趙南塘汝談其壻也爲序  
其集而傳之

適齋類藁八卷

奉新袁去華定卿撰案文獻通攷作宜卿紹興乙丑進士改官知石首

縣而卒善為歌詞嘗賦長沙定王臺見稱於張安國為書之

梅溪集三十之卷續集五卷

案梅溪集下原本無卷數今據文獻通攷補正

詹事樂清王十朋龜齡撰丁丑大魁立朝剛正劉琪作序案未

句原本脫去今據文獻通攷增入

酒隱集三卷

宣州司理趙育去病撰其父鼎臣承之號竹隱畸士者也

四六類藁三十卷

起居郎建安熊克子復撰皆四六應用之文也亦無過人者

克以王丞相季海薦驟用王時在樞府趙溫叔當國莫知其

所從來頗疑其由徑沮之而上意鄉之不能回也

拙庵雜著三十卷外集四卷

工部侍郎東平趙礪老渭師撰門下侍郎野之姪以婦翁歐

陽懋待制澤入仕從范石湖使金虞丞相并父亦薦之遂擢

用知臨安坐殿司招兵事謫饒州

雙溪集二十卷

知郴州東陽曹冠宗臣撰由舍選登甲科坐為秦壩假手奪

官再赴廷試得初品

止齋集五十三卷

案文獻通攷作五十二卷

中書舍人永嘉陳傅良君舉撰三山本五十卷

水心集二十八卷拾遺一卷別集十六卷

史部侍郎永嘉葉適正則撰淮東本無拾遺編次亦不同外  
集者前九卷爲制科進卷後六卷號外彙皆論時事末卷號  
後總專論買田贍兵

邱文定集十卷拾遺一卷

樞密江陰邱密宗卿撰隆興癸未進士第三人其文慷慨有  
氣而以吏能顯故其文不彰

趙忠定集十五卷奏議十五卷

丞相福公趙汝愚子直撰別本總爲一集亦三十卷

龍川集四十卷外集四卷

永康陳亮同父撰少入太學嘗三上孝廟書召詣政事堂宰  
相無宏度迄報罷後以免舉爲癸丑進士第一未祿而卒所

上書論本朝治體本末源流一時諸賢未之及也亮才甚高  
而學駁其與朱晦翁往返書所謂金銀銅鐵混爲一器者可  
見矣平生不能詩外集皆長短句極不工而自負以爲經綸  
之意具在是尤不可曉也葉適未遇時亮獨先識之後爲集  
序及跋皆含譏誚識者以爲議

軒山集十卷

樞密使獻肅公濡須王蘭謙仲撰淳熙乙未駕幸太學蘭爲  
武學諭在班列中人物偉然上一見奇之自是擢用馴至執  
政其在經帷論官僚攀附而登輔佐者挾數用術道諛濟私  
陳義凜然嘉定以來其子孫不敢求仕亦不敢請諡至端平  
乃得諡

合齋集十六卷

祕書少監永嘉王栴叔撰乾道丙戌進士在永嘉諸老最爲先登其容貌偉然襟韻灑然雖不以文自鳴而諸老皆推敬之

兼山集四十卷

端明殿學士劍門黃裳文叔撰在嘉邨最久備盡忠益甲寅御極未及大用病不能朝士論惜之

攻媿集一百二十卷

參政四明樓鑰大防撰隆興癸未省試考作賦魁以犯諱當

黜知舉洪文安遵奏收寘末甲首

案原本寘字下闕今據文獻通攷校補

齊齋甲藁二十卷乙藁十五卷翰林前藁二十卷後藁二卷披

垣詞草二十卷兼山論著三十卷附益五卷年譜一卷

禮部尙書歸安倪思正父撰丙戌進士戊戌宏詞受知阜陵蚤登禁直紹熙間遂位法從立朝剛介不苟合慶元嘉定屢召屢出嘗言與其爲有瑕執政寧爲無瑕從官由是名重天下端平初詔以先朝遺直得謚文節

晦巖集十二卷

祕書丞鹽官沈清臣正卿撰嘗爲國子錄有薦于朝欲得召試執政有發笑者曰安有張子蓋女壻而可爲館職者乎遂罷欲爲奇節以蓋之會王希呂爲諫官上書力言其不可孝宗大怒時相虞允文惡沈介下清臣大理風使引介不從謫封州晚乃召用勸孝宗力行三年喪爲翊善嘉邨以直諒稱

初從張無垢學後居霅川自嶺南歸開門受徒動以聖賢自命效禪門入室規式與其徒問答下語不契輒使再參頗爲人所譏

靜安作具十四卷別集十卷

清江徐得之思叔撰與其子筠孟堅同甲辰進士次子天麟仲祥亦乙丑甲科其家長於史學

定齋集四十卷

寶謨閣直學士蔡戡定夫撰君謨四世孫丙戌甲科

東江集十卷

丞相臨海謝深甫子肅撰

小山雜著八卷

知樞密院龍泉何澹自然撰

慈谿甲藁二十卷

寶謨閣直學士慈谿楊簡敬仲撰

鈍齋集六十卷

著作郎唐安楊濟濟道撰淳熙五年進士京鏗帥蜀上已出遊濟爲樂語首云三月三日豈無水邊麗人一詠一觴亦有山陰禊事又云良辰美景賞心樂事四者難并崇山峻嶺脩竹茂林羣賢畢至一時傳誦京爲相召入館權郎出知果州而終

周氏山房集二十卷後集二十卷

祕書省正字吳郡周南南仲撰南有聲學校庚戌登甲科而

仕不偶再入館再罷以殿廷所授文林郎終焉

二松集十八卷

案文獻通攷二松作三松宋史藝文志不載

廬陵王子俊才臣撰周益公楊誠齋客以列薦補官入蜀為

成都帥幕

橫堂小集十卷

右司郎中福清林桶子長撰

潔齋集二十六卷後集十三卷

案後集文獻通攷作十二卷

禮部侍郎四明袁燮和叔撰

北山集略十卷

直龍圖閣三山陳孔碩膚仲撰全集未傳

育德堂外制集八卷內制集三卷

兵部尚書永嘉蔡幼學行之撰成童穎異從同郡陳傅良君

舉學治春秋年十七試補上庠首選陳反出其下明年陳改

用賦冠監舉而幼學為經魁又明年省闈先多士而傅良亦

為賦魁一時師弟子雄視場屋莫不歆艷

止安齋集十八卷

太府寺丞三山陳振震亨撰

西山集五十六卷

參政浦城真德秀希元撰

平齋集三十二卷

翰林學士於潛洪咨夔舜俞撰

退庵集十五卷

提轄文思院龍泉陳炳撰

梅軒集十二卷

奉化丞山陰諸葛興仁與撰

遁思遺藁六卷事監韻語三卷

永康呂皓子陽撰遁思其庵名後溪劉光祖德修爲作記當  
淳熙中投匭救父兄之難朝奏一夕報可一時非辜盡得清  
脫其書辭甚偉然非孝廟聖明安能照覆盆之下哉

劉汝一進卷十卷

諫議大夫吳岵劉度汝一撰度嘗應大科此其所業也策曰  
傳言論曰鑑古各二十五篇

唯室兩漢論一卷

吳郡陳長方齊之撰紹興八年進士

鼎論三卷時議一卷

三山何萬一之撰隆興元年進士仕爲都司知漳州

治述十卷

從政郎鄭澁紹興元年撰進按丙戌榜有三山鄭澁溥之是  
年已爲祕書郎面對劄子剴切通練于今傳誦此當別是一

鄭澁耶

廬山雜著一卷

知南康軍錢聞詩撰

閑靜治本論五卷將論五卷



知樞密院廣陵張巖肖翁撰

閩秀集二卷


建安徐氏撰徐林穉山之從姑祥符敕頭案唐時舉去詞第一謂之敕頭原本

敕訛作初又脫去頭字今據文獻通攷改正詭之姪孫女嫁括其兄璣為部使

者有子曰承之嘗知滁州



直齋書錄解題卷十八



70033187

